


明

書

一〇







傅維鱗纂

明書卷五十二

志五

綸換志二

建文皇帝

即位詔

十八日詔赦天下。詔曰。天佑下民作之君。我高祖皇帝受天之命。統有萬邦。宵衣旰食。宏濟斯民。凡事有益於天下者。無所不用其心。政教休明。規模宏遠。朕以眇躬。纂承大統。恭依遺詔。於洪武三十一年閏五月十六日。卽皇帝位。夙夜惶懼。思所以克相上帝。寵綏四方。以無忝我皇祖之大命。永惟寬猛之宜。誕布維新之政。其以明年正月初一日爲建文元年。大赦天下。嗚呼。德維善政。政在養民。當遵先聖之言。期致雍熙之盛。百辟卿士體朕至懷。自洪武三十一年閏五月十八日昧爽以前。大辟罪以下已發覺。未發覺。已結正。未結正。當赦所不原者。咸赦除之。敢有以赦前事相告。以其罪罪之。故茲詔示。想宜知悉。

追尊冊立分封詔

詔曰。朕惟有盛德而不享其報者。必垂慶於後昆。履大位而不逮乎親者。必致尊於宗廟。此天下之至理。

古今之通義也。昔我太祖高皇帝平定天下。承千載之大統。皇考懿文皇太子蚤登儲位。參決萬幾。默施寬仁。陰贊至治。視斯民如赤子。體天眷之聖德。錫祐朕躬。太祖皇帝奄棄臣民。肆朕嗣登上位。既謚太祖爲高皇帝。孝慈皇后爲高皇后。而皇考謚號未稱。心切悼焉。邇者採羣臣之言。追尊皇考爲孝康皇帝。廟號興宗。皇妣敬妃爲孝康皇后。擇日祔廟。羣臣復謂中宮之號未正。無以共承祭祀。諸弟之封未定。無以夾輔邦家。繼以爲請。已冊妃馬氏爲皇后。封弟允熥爲吳王。允煙爲衡王。允熙爲徐王。夫尊親所以崇孝敬之道。正家所以厚風俗之原。嘉與萬方同臻至治。

興師北伐詔

詔曰。朕奉先皇帝遺詔。纂承大統。宵旰衣食。思圖善政。以安兆民。豈意國家不幸。骨肉之親。屢謀僭逆。去年周庶人櫨潛爲不軌。辭連燕齊湘三王。皆與同謀。朕以親親之故。不忍暴揚其惡。止治櫨罪。餘置不問。今年齊王榑謀逆事覺。推問犯者。又言與燕王棣。湘王柏同謀大逆。柏自知罪惡難逃。自焚死。榑已廢爲庶人。朕以燕王棣於親最近。未忍窮治其事。今棣乃忘祖逆天。稱兵構逆。意欲犯闕。危宗祖。悖逆如此。孰不駭聞。昔先皇帝時。棣包藏禍心。爲日已久。印造僞鈔。陰結人心。朝命窮極。藏匿臯人。先帝因怒。遂以成疾。至於升遐。海內聞知。莫不痛忿。今不悔過。又造滔天之惡。雖欲赦之。而獲罪宗社。天地不容。已告太廟。廢爲庶人。遣長興侯耿炳文等率兵三十萬往討其罪。咨爾中外臣民軍士。各宜懷忠守義。奉職平燕。與國同心。永安至治。布告天下。咸使聞知。

改都察院爲御史府詔

詔曰頃以斷獄繁易御史臺號都察院興刑部分治庶獄今賴宗廟神靈斷獄頗簡其都察院承漢制爲御史府專以糾貪殘舉循良匡政事宣教化爲職省御史員定爲二十八人務爲忠厚以底治平

召勤王詔

詔曰燕兵勢將犯闕中外臣民坐視余之困而不余救乎凡文武吏士宜卽日勤王共除大難宗社再安余不敢忘報

太宗文皇帝

卽位詔

詔曰昔我皇父太祖高皇帝龍飛淮町汛掃區宇東抵虞淵西踰崑崙南跨南交北際潮海仁風義聲震
蓋六合。召爽闇昧咸際光明三十年間九有甯謐宴駕之日萬方嗟悼煌煌功業恢於湯武德澤廣布至
仁彌流姪允炆以幼冲之資嗣守大業秉心不孝更改憲章戕害諸王放黜師保崇信奸回大興土木天
變於上而不畏地震於下而不懼災延承天而文其過蝗飛蔽天而不修德益乃委政宦官淫泆無度禍
機四發將及於朕朕惟高皇帝嫡子祖有明訓朝無政臣內有姦惡王得興兵討之朕遵奉條章舉兵以
清君側之惡蓋出於不得已也使朕兵不舉天下亦將有聲罪而攻之者允炆曾不反躬自責肆行旅拒
荷蒙天地宗社之靈戰勝攻克擣之於墳上殲之於白溝破之於滄洲瀆之於藁城塵之於夾河轘之於

靈璧六戰已不國矣。朕於是駐師畿甸，索其姦回，庶希周公輔成之誼，而乃不究朕懷，闔宮自焚，以自絕於宗社。天地所不庇，鬼神所不容，事不可已。朕乃整師入京，秋毫無犯。諸王大臣謂朕太祖之嫡，應天順人，天位不可以久虛，神器不可以無主。上章勸進，朕拒之再三，爰乃俯徇輿情，已於六月十七日卽皇帝位。於戲，文帝入漢，尚資恭儉之風；武王紹周，願廣至仁之化。布告天下，其體朕懷。洪武三十五年七月初一日。

大封功臣詔

詔曰：昔元末興兵，豪傑競起，割據土地，糜爛生民。天命我父皇太祖高皇帝龍飛淮甸，東征西討，掃除禍亂，華夷一統，身致太平。垂四十年，父皇賓天，建文嗣位，頑很昏昧，專任姦回，內作色荒，改更成憲，殘害宗親，將及朕躬。朕不得已，起兵自救，身親戰陣，已經四載，賴天地祖宗之靈，遂平內難。爾諸將奉天征討，將士臥雪眠霜，櫛風沐雨，百戰百勝，萬死一生，報太祖之深恩，弘濟艱難，宣力甚多，輔成大功。仰稽太祖皇帝開國功臣賞賜等第，參酌得宜，論功高下，定爾爵賞。朕不敢私，在爾諸將亦自知之。於戲，人君之職，惟在奉天爵賞之頒，豈容私意。今以天下之財，賞天下之功，民之資力有限，名爵之貴無窮，故茲賚與，亦不以多少爲輕重。或朕知有未盡，未滿爾心，對朕自陳，若退有後言者，於犯法甚不可也。但恐爾不立功，爾今後果能立功，至再至三，不吝爵賞。朕之此言，通於天地，布告爾衆，咸使聞知。洪武三十五年九月初四日。

詔曰朕荷天地神靈祖宗庇祐繼承大統華夏肅清稽於古典虞夏殷周之盛亦資內助以致雍熙朕皇考太祖高皇帝肇修人紀惇典庸禮臻茲治平薄海內外室家相慶功德兼隆興天同運亦惟皇妣孝慈高祖后效法承天肅雍顯相德配聖人化家爲國朕奉藩於燕垂二十年正妃徐氏開國元勳中山武甯王徐達之女佐朕皇考咸有一德格于皇天天惟申命用休君臣篤慶榮裕始終毓茲貞淑嬪于肇封家政輯甯朕恭行天討無內顧之憂厚德嘉禎壇儀懿範同朕恭勤保茲天命君臨爾萬姓之上是用於洪武三十五年十一月十三日命使奉金冊金寶立徐氏爲皇后正位中宮恭承宗廟布告天下咸使聞知

洪武三十五年十一月十三日

復封諸王詔

詔曰仁義之推施由親始帝王之治睦族爲先歷觀往古克治太平未有不由茲道也昔朕皇考太祖高皇帝受天明命奄有萬方隆厚親親及於異姓寰宇同風誠惇孝友乃遵古道封建諸王藩屏帝室與國咸休允炆無道不孝不君不恥不仁不畏不義滅絕天理敗壞人倫恣其狂很悖祖滅親卽位三年骨肉幾盡周王奉藩守法循理匡輔朝廷初無罪愆忠不見信以賢見疑偏聽讒言忽興師旅籍其資財空其宮室害其宮屬周王莫知其由自來京師欲伸枉屈略不加察卽竄之蠻夷萬里瘴癘之鄉流離道路父子殊方幽囚苦困穴牆通食體無完衣窮窶危辱濱於死亡誣構湘王令其閩宮自焚加以惡謚執齊王於京邸囚代王於大同囚岷王於雲南日夜所思惟殘賊骨肉之計不盡不饜乃以懿文太子薨逝之時

皇考欲立朕爲嗣。尤所猜忌。無釁可圖。聽信姦臣。縱兵害朕。朕不得已。舉兵自救。荷天地神明祖宗孚佑。皇考之靈。兵至畿甸。索其姦回。炆自知慚負天地。無顏相見。自焚而死。諸王臣民尊朕爲皇帝。重念骨肉之親。良深存沒之感。是用復封周王於河南。齊王於青州。湘王賜謚曰獻。治其墳廟。代王岷王皆脫拘囚。還其封爵。秦愍王之子尙爌。封爲興平王。尙熒爲永壽王。尙忻爲安定王。晉恭王之子濟爌。爲平陽王。濟爌。爲廣昌王。周王長子有燉。復爲周世子。次子有勳。封爲汝南王。有烜。爲順陽王。有燭。爲祥符王。有熲。爲新安王。有光。爲永甯王。有煥。爲汝陽王。有爌。爲鎮平王。有悌。爲宜陽王。齊王之子賢燧。爲樂安王。賢熑。爲長山王。賢寔。爲平陽王。於戲。天有顯道。厥類爲彰。善惡之應。捷於影響。皇考重分封之意。允效絕骨肉之恩。不孝違天。天命殛之。今朕奉天。復遵舊制。藩屏宗親。期百世本支之盛。山河帶礪。資萬年磐石之安。布告天下。咸使聞知。永樂元年正月十三日。

改謚高帝后詔

詔曰。朕惟帝王盛德。皆因實以著名。達孝尊親。必揚名而顯實。此放勳重華。所以贊堯舜。而宣哲於皇。所以頌文武也。洪惟朕皇考皇帝。聰明神武。峻德格天。至誠昭合於乾剛。光大實侔於坤厚。固天縱之至聖。應麻數之在躬。當元運之訖祿。四海紛紜。強暴相凌。生民塗炭。憫墊溺之莫拯。奮一劍以龍興。曾無寸土。一民之階。自有英雄萬國之會。汛掃塵氛。奠安寰宇。不數載而成帝業。乃一舉而治太平。制禮作樂。典章煥乎重新。用夏變夷。人文蔚其宣著。卽東西際。日月之出沒。南北極寒暑之幽遐。咸蒙覆幬。均被沾濡。四

十餘年德教洋溢淳風熙皞自生民以來未有盛於皇考皇帝者也皇妣孝慈皇后齊莊懿淑恭儉仁孝誕符景運作配至尊弘濟艱難化家爲國盡其誠敬之心以奉神靈之統輔成內治表著母儀極天下之富貴曾何加乎其身躬蠶以桑爲常服澣澣不爲異有樛木逮下之德致螽斯多男之祥雖媯汭嬪虞塗山啓夏有娀肇殷摯任興周蹟同開創實莫與京自古后妃未有盛於皇妣孝慈皇后者也仰惟二聖之鴻休允合兩儀之大德日月于邁深切孝思念名號未稱乎功德典禮必在於尊崇考諸經史之文尤重尊親之謚迺者下詔廷臣上定尊謚衆心戴慕與議僉同皇考尊謚聖神文武欽明啓運峻德成功統天大孝高皇帝廟號太祖皇妣尊謚孝慈昭憲至仁文德承天順聖高皇后告於天地宗社以六月十一月恭上冊寶於戲顯號鴻名永協臣民之公論配天享祀用伸人子之至情光華宇宙垂裕萬年布告天下咸使聞知永樂元年六月十二日

冊立太子詔

詔曰立太子以尊宗廟重社稷樹王國以廣藩輔隆本支非一家之私爲天下之公夏商周漢唐宋之盛用此道也朕皇考聖神文武欽明啓運峻德成功統天大孝高皇帝皇妣孝慈昭憲至仁文德承天順聖高皇后聖靈陟降敷佑朕躬君臨大寶夙夜靡甯思惟賢德傳敍維成繼續神明之統紀益爲皇考妣之光華監官簡俾延歷於茲周王以宗室之長屢表請立太子封建諸王宗室羣臣百姓合辭累表謂朕長子足以嗣承宗廟諸子皆足以夾輔邦家朕惟天下之通義詢衆志之僉同乃於永樂二年四月初四日

立長子高熾爲皇太子授冊寶正位於戲治法前王統承列聖內外相維保宗社萬年之福華夷同樂亘古今全盛之基布告天下咸使聞知永樂二年四月初四日

免北京錢糧詔

詔曰朕祇承天命統紹鴻基安民之心不忘夙夕思昔姦臣謀危宗社毒害親親奉藩於燕橫遭讒間禍機四發興兵圍逼危迫朕躬實不得已用兵自救誅討姦回以平內難當時朕帥將士南征躬擐甲冑臥雪眠霜間關行陣衝冒鋒鏑乘危轉逸萬死一生諸將士與朕同甘苦勤勞尤甚時皇太子居守北京賴軍民竭忠効力不避艱難供給軍需饋運糧餉馳驅負輓晝夜不甯攻守戰鬪披堅執銳冒犯矢石父母妻子不保朝夕甚爲勞苦使朕無北顧之憂遂誅姦回定平禍亂奠安宗社朕自卽位以來念爾將士人民飲食夢寐時刻不忘其間民有效順始終不變者已嘗全免稅糧以酬其勞比年之間北京所屬郡縣數被水患歲穀不登民多缺食流移他所朕甚憫焉其北京永樂四年五年所有該納稅糧馬草折收米豆戶口食鹽價米諸色課程逋未納者盡行蠲免其諸色課程仍自永樂六年爲始除見收在官外免徵三年門攤課程三年免徵後革去增加之數只依舊額供辦於戲同濟艱難久念勤勞之績憫茲窮乏覃敷寬恤之恩庶俾康寧少伸朕意故茲詔諭咸使聞知永樂六年二月十八日

親征北虜詔

詔曰朕受天命承太祖高皇帝洪基統馭萬方撫輯庶類四夷僻遠靡不從化獨北虜殘孽處於荒裔肆

驕兇暴屢遣使臣開諭輒拘留殺戮乃者其人犯邊邊將獲之再遣使護送復見拘殺恩既遄背德豈可懷況豺狼野心貪悍猾賊虐噬其衆引領溪蘇稽於天道則其運已絕驗於人事則彼衆皆離朕今親率六軍往征之大振武威用彰天討且朕必勝之道有五以大擊小以順取逆以治攻亂以逸代勞以悅弔怒鮮不殘絕蕩除有罪掃清沙漠撫綏顛連則疆場久安人民無轉輸之苦將士無饑寒戰鬪之虞可以解甲高枕一勞久逸暫費永寧也布告中外咸使聞知永樂八年二月初四日

平虜第一詔

詔曰自元祚既終四海鼎沸天命我太祖高皇帝統一華夏普天率土靡不臣妾惟虜寇遺孽奔竄沙漠
嘗竊偷生殺戮易置有如反掌朕承大統撫治寰區志在安民惟懷不及盡心殫慮以求其寧凡居覆幬之中舉納甄陶之內獨此殘胡驕兇梗化屢使撫循輒見拘殺往者邊將擒其部屬念其各有父母妻子盡釋還鄉遣使送之彼狃性不移復殺信使積慝恣虐益肆寇擾怨懃神人實天所殛遏虐之旅以慰溪蘇遂親率六軍往征之用拯顛連綏寧降附五月十三日師至幹難河遇胡寇本雅失理來戰卽摧敗之追奔逐北電掃霆驅本雅失理奔命不暇以七騎奔遁獲馬駝牛羊生口無算其餘款附者相繼而至遂撫安之給其羊馬糧廩令各安生業數百種之拚芽一旦蕩除千萬里之腥羶由茲洒滌乃封於山川振旅班師於戲包舉無外弘施一視之仁撫輯有方永樂萬年之治布告中外咸使聞知永樂八年五月二十日

平虜第二詔

詔曰朕祇奉天命撫馭華夷惟欲乂安咸得其所瓦刺黠寇僻處窮荒與其醜類歲在饑殺敗亡喪沒存者無幾朕卽位之初撫摩存恤授以封爵數年以來憑仗朝廷始得休息烏合爲羣卽復驕恣辜德負恩背違信義擅自弑立執殺使臣侵擾邊境天豕封狼貪欲無厭覬覦自大朕不得已躬率六軍以討之師至撒里哈兒之地賊兵來迎戰一鼓而敗之追至土刺河賊首答里巴馬哈木太平把禿孛羅不度智能掃境而來兵刃纔交如摧枯振朽追奔逐北獸獮禽戮殺其名王以下數千人斬馘無算餘孽宵遁遂班師而還歸至飲馬河和寧王阿魯台遣其酋長率衆詣軍門來朝推誠待納以安反側勞徠撫輯令回部落於戲奉行天罰掃腥羶於絕塞綏寧附順覃恩澤於遠人俾中國免征輸之勞邊邑無烽堠之警故茲詔示咸使聞知永樂十二年六月二十八日

北京御殿詔

詔曰開基創業興王之本爲先繼體守成經國之宜尤重昔朕考太祖高皇帝受天明命君主華夷創立江左以肇邦基肆朕續承大統恢弘鴻業惟懷永圖眷茲北京實爲都會地勢雄偉山川鞏固四方萬國道理適均惟天意之所屬實卜筮之攸同乃倣古制徇輿情立南京置郊社宗祖創建宮室上以紹皇考太祖高皇帝之先志下以開子孫萬世之弘規且於巡狩駐守實有便焉爰自營建以來天下軍民樂於趨事天人協贊景貺駢臻今工已告成選以永樂十九年正月朔旦御奉天殿朝百官誕新治理用致

雍熙於戲天地清寧衍宗社萬年之福華夷綏靖隆古今全盛之基故茲詔皇帝敕諭文武羣臣朕聞爲君難爲臣不易創業難守成不易剛柔寬猛適其中禮樂刑政有其序唐虞三代至漢唐宋率由斯道是故舜清問下民報虐以威誅四凶聖讒說明五刑然後無爲恭己南面神禹承之無間可議夏桀之亂民從其暴成湯之興兼弱攻昧取亂侮亡肇修人紀用革憎淫旣奠四方子孫承之惟監成憲殷紂之亂商俗靡靡周公相武王誅紂伐奄遷殷頑民滅國五十繼相成王制禮作樂垂拱仰成刑措不用漢承秦大亂之後高祖令蕭何定律令韓信伸軍法張蒼定章程法令嚴明惠帝清淨至於文景挾書之律肉刑之慘一切除之務行寬厚唐承隋末詔訛汰侈暴慢成風高祖定官制頒律令立租庸調法汰僧道勸臣犯法無所假貸太祖貞觀之後懲斬趾禁鞭背刪定律令變爲輕典力行仁義幾致刑措宋興承五季之亂太祖太宗頗用重刑以繩姦慝躬自折獄務抵明慎立法之制嚴示咸使聞知永樂十八年十一月初四日

北京宮殿成大赦詔

詔曰朕荷天地祖宗眷祐繼承大統撫馭萬方夙夜祇勤率遵成憲乃者紹皇考太祖高皇帝之制效成周卜洛之規建立兩京爲子孫帝王萬世之基爰自經營以來賴天下臣民殫竭心力涉寒暑冒風霜趨事赴工勤勞匪懈朕心眷念拳切不忘今宮殿告成朕已御正朝祇祀天地宗廟社稷懋圖治理嘉與維新重懷寬恤之仁用廣好生之德大赦天下於戲華夷一統覃敷曠蕩之恩海宇清寧永樂太平之治故

茲詔示咸使聞知永樂十九年正月十五日

奉天殿災詔

詔曰朕恭膺天命統馭華夷夙夜祇勤罔敢忽怠比者遵倣古制肇建兩京惟在安民永隆基業乃永樂十九年四月初八日奉天殿災朕爲此懼莫究所由此朕不德之所致歟抑任用匪人毒痛天下而致此歟今特詔告天下凡有殃及於吾民及不急之務悉皆停止用蘇困弊以答天心於戲奉天法祖敢忘修省之誠布德覃恩用舉寬仁之政故茲詔示咸使聞知永樂十九年四月十三日

平虜第三詔

詔曰天地之大覆載而無外帝王之治一視而同仁朕恭膺天命主宰華夷夙夜勤勞勉圖治理無非使天下生靈咸得其所而已往者醜虜阿魯台窮居漠北鼠穴偷生屢爲瓦刺困逼妻子不保遂率其部落來歸朕念其遑遑無依特加優恤授以封爵令其仍居本土安生樂業永享太平豈意北虜心懷譖詐僭妄驕矜違天逆命負德辜恩殺戮信使侵犯邊境恣肆慘酷毒痛生靈朕以保愛天下軍民躬率六師往討之以七月十四日師抵闊欒海之北其醜虜阿魯台聞風震懾棄其車輛牛羊馬匹逃命遠遁躬追累日獲其謀者云醜虜阿魯台自知負德辜恩驚悸失措致病殂羸爲天地鬼神所殛餘孽潰敗朕乃移兵勦捕其惡黨兀良答之寇東行至屈裂兒河逼寇迎敵朕親率前鋒摧敗之直抵其巢穴殺賊首數十人斬馘其餘黨無算獲其部落人口焚其車輛兵器盡收其馬匹牛羊綏撫降附振旅班師嗚呼聲罪致討

用伸九伐之威。殄寇安民。永樂萬年之治。布告中外。咸使聞知。永樂二十年八月十七日。

勝虜第四詔

詔曰。朕恭膺天命。統承皇考太祖高皇帝鴻業。夙夜究治。惟懷永圖。比以天虜殘孽。辜恩負德。梗化弗廷。乃以今夏四月四日。躬御六師。往討之。師駐應昌。前鋒獲虜聲息。詢悉。擊虜去。秋探知大軍出塞。卽挾妻子遠竄山谷。圖保殘喘。至冬又爲天地鬼神所譴。雨雪連綿。積深尋丈。其牛羊驟馬亡弊殆盡。種落叛散。互相劫奪。及今又聞大軍之初。日夜奔遁。深入漠北。窮蹙困迫。莫克自知。朕以爲此寇謠詐未可深信。徑進兵至答間。納木兒河。窮摵極索。直抵白邙山。四望蕭條。曠無人跡。遂移師東行。踰屈裂兒河。復涉溥溫河。擣賊孽黨。閱其巢穴。悉已傾蕩。耕牧之地。盡爲荒墟。是用班師還京。於戲。征伐國之重事。昔高宗之伐鬼方。周宣之逐玁狁。豈其不得已哉。然皆爲保庇生靈。規國遠圖。是以徂征之師。不容不舉。今妖氛汛掃。沙漠肅清。豈惟朕之威力所及。實賴宗社之靈。天心眷佑。永貽四海蒼生無窮之福。故茲詔示。咸使聞知。永樂二十一年七月十五日。

封忠勇王詔

詔曰。朕惟天地覆載。以生育爲德。帝王統馭。以安養爲心。順者撫之。所以示無外而一天下也。且夷狄爲患。其來已久。書曰蠻夷猾夏。詩稱戎狄是膺。歷漢及唐。屢被侵侮。至於有宋。其禍尤甚。是以腥穢上聞。天生我皇考太祖高皇帝。受天明命。主宰生靈。削平禍亂。掃蕩腥羶。以開萬萬年太平之盛治。聖

德成功。自開闢以來。未之有也。肆朕躬膺天命。紹承大統。夙夜圖治。惟在安民。蕞爾醜虜。尙敢偷生草野。鼠竊邊疆。已嘗躬率六師往平之。芟除惡類。撫輯善良。令其仍居本土。以遂其生。不意其違天背德。叛服無常。復來犯我邊疆。乃以今秋七月二十四日。朕躬御戎服。親率將士出塞以討之。乃命寧陽侯陳懋爲前鋒。以攻其西。朕兵抵陰山之脊。適虜中僞知院阿失鐵木兒等率妻子來降。備言虜寇爲瓦刺順寧王脫歡等勦戮。餘孽奔潰。逃命無所。未幾前鋒寧陽侯陳懋又得其名王也。先士于率部落。及其家屬馬驥牛羊以數萬計。遠來降附。然也先士于驕悍勇猛。乃虜寇中之最狡黠者。虜共畏服。今旣稽首軍門。敷陳誠悃。以爲天命在朕。不敢違越。敬率部落上順天道。親來朝見。眷茲忠誠。宜加撫勞。特封爲忠勇王。以表其來歸之心。是用班師還京。於戲。安夏攘夷。用致雍熙之治。綏降撫順。廣推一視之仁。詔告中外。咸使聞知。永樂二十一年十月十三日。

仁宗昭皇帝

卽位詔

詔曰。朕惟上天生民。爰立君主。仁育兆庶。咸底於泰和。統御華夷。同躋於熙皞。我先皇帝奉天撫運。治化高於百王。文德武功。聲教被於四海。比緣邊警。廬龍御以親征。逮及凱旋。竟鼎湖之升逝。遺命神器。付予眇躬。顧哀疚之方深。豈遵承之遽忍。宗親公侯駙馬伯文武臣僚。軍民耆老。及四夷朝貢之使。俯伏闕下。奉表勸進。以爲天位不可以久虛。生民不可以無主。長嫡承統。國家常經。陳詞再三。瀝懇勤切。用是仰遵。

遺命俯徇輿情已於八月十五日祇告天地宗廟社稷卽皇帝位奉祖考之洪佑仰聖神之永圖屬茲蒞祚之初宣布維新之命其以明年爲洪熙元年於戲軍民一體愛人必務於寬弘賞罰有經爲國必彰於明信尙賴文武賢卿中外良臣據乃忠貞匡輔不逮用承鴻業隆國家永遠之基嘉惠羣黎廣海宇治平之福敷告天下咸使聞知永樂二十二年八月十五日

上謚號詔

詔曰朕惟自古聖君哲后有大功有大德者必有顯號徽稱以表揚鴻美垂萬萬年欽惟皇考大行皇帝躬膺天命統御兆民制治保邦隆繼述之大孝篤近舉遠同覆載之至仁神武弘廓清之功聖文廣輯熙之化天地宗社享於上華夷蠻貊戴於下輿圖克拓曠古所無泰和融液嘉徵畢至海宇乂寧臻於熙皞欽惟皇妣仁孝皇后德熙九聖上配宸嚴至順以承天厚德以載物含弘光大端一誠莊隆化理之原篤宗祧之敬宣昭懿範母儀天下神遊益遠哀慕無窮屬茲繼敍之初式舉遵崇之典謹命文武羣臣稽古禮文議薦謚號大公之義輿論僉同祇告天地宗廟社稷恭上皇考大行皇帝尊謚體天弘道高明廣運聖武神功純仁至孝文皇帝廟號太宗皇妣仁孝慈懿誠明莊獻配天齊聖文皇后於戲惟神聖配乾坤蓋名言之莫罄惟光華同日月著尊仰於不忘敷告臣民咸使聞知永樂二十二年九月初十日

立太子封諸王詔

詔曰朕惟致理必先正內所以崇王化之基承統必重建儲所以厚國家之本迺若衆建宗室式以永壯藩維帝王大經典章斯在朕祇承天敍君主萬邦顧茲臨御之初方布維新之治念德澤之未究竟夙夜之靡寧而親王勳臣文武百辟志存愛國咸懷永圖屢表據誠請立皇后建皇太子稽率舊章勉徇衆志已於十月初八日冊立妃張氏爲皇后十一月立嫡長子瞻基爲皇太子封諸子爲王於戲惇敍雍倫自家邦以達乎天下鞏固宗社隆本文以傳於萬年用弘仁厚之風永協雍熙之化布告天下咸使聞知永樂二十二年十月十八日

宥盜詔

詔曰朕以眇躬托於億兆之上天下治亂實係於朕懼德不類罔敢怠荒兢兢業業日慎一日兩紀於今矣然繇頃者任用輔相委寄過隆顥權生事以紛亂我祖宗之成憲兼以所在牧守撫字無狀以故澤靡下究情不上通事既雍塞人懷疑阻遂致賊盜相挺以興蓋自兩河兩淮而西接於閩陝荆湖二江二浙而南底於閩粵嶺海大慾小醜實繁有徒戕殘我人民蹂躪我疆土甚者竊據城邑僭稱號名兵連累年怨氣凝結生靈塗炭閭井邱墟國家百年亭育之功一旦蕩然興言及此深用愧悼靖思厥咎罪實在朕念茲庶民皆我赤子朕旣不德不能盡君人之責使惑於煽誘以陷於匪人苟究武威必示諸討而不開以自新雖欲政行爲善厥路亡繇是重朕不德也朕方願與民更始其獨安取此屈己弘物朕所不吝古今爲始應凡盜賊不分首從苟從招安卽與原貸非特待之以不死尊爵厚祿頒賞有差於戲古人有言

亂匪降自天人則爲之抑生人何辜非朕之不德無以至此天怨於上人怨於下顧惟菲薄敢昧罪已凡爾將帥尙咸諭朕意殺降戮順厥有重罰務在綏輯以圖底於康寧用副朕思慮之誠廣朕好生之德朕言不爽其明聽毋忽永樂元年月日

勑羣臣詔

詔曰朕承積累之體撫盈成之運臨御歲久望治日深永爲前世之相沿各有當時之所尙三代而上忠樸質文之累更兩漢以來名節經術之異守或清淡之爲務或道學以相師便以相循莫不久而成蔽昧於張弛弗知變而後通爰暨我朝所鑒往代然當法制之肇建實惟更議之首遵小紀大綱罔有條而不紊前規後矩乃量一之是拘凡利害之所存必章程以爲據咸樂相仍於苟且靡圖自獻於猷爲頃繇邇臣之蔽予益使正塗之壅底持祿者□囊而拱默懷姦者首鼠而依違蔑塞塞之匪躬慕容容之後福幾致防川之患寢成罔上之風覽習俗之至斯嗟治體之已累朕當饋而歎反席以思仰祖宗之貽謀本崇於信厚故國家之作則首務於整齊勢無不弊之時道有好還之理咨予三事羣牧暨爾衆僚庶士勉罄忠純各思勵翼毋牽於忌諱言必由衷毋略於幾微謀須慮遠共懲膠柱爲固滯庶求解弦而更張畢殫獻替之誠允濟艱難之業今以爲始朕以改圖綜核名實之詳繼□宣之遺則推行仁義而效緝唐后之餘風期臻三代之隆永有萬年之譽朕言匪過衆聽敢違永樂年月日

躬祀南郊詔

詔曰朕惟君國之道事天爲大事天之實恤民爲本我國家聖聖相承太祖高皇帝紹基垂統弘靖萬邦太宗文皇帝繼志守成德威廣被天下無事生民乂安六十年於今矣是皆天地祐祚之隆祖宗功德之盛肆及眇躬獲承鴻緒嗣位以來夙夜祇慎上惟天命之重下念生民之艱式嚴昭事庶臻康濟謹於今年正月十五日恭祀天地於南郊股肱助相羣工駿奔三靈交悅百順介祥嘉與臣民均膺慶澤於戲郊禋致誠所以仰答靈貺陽春布德所以順體乾元迎導至和發育庶品尙資有位咸懋乃官推其仁愛之誠輔我太平之治詔告中外咸使聞知洪熙元年正月十五日

恤刑詔

詔曰朕恭承大統爲天下生民之主惟我皇祖皇考愛民之仁祇率不怠旦夕思念人命甚重哀矜庶獄惓惓在懷夫刑以禁暴止邪導民於善豈專務誅殺哉故律令之制善善長而惡惡短罰之輕重咸適厥中顧執法之吏不能革平有虛飾其情專致死罪而比附謬妄尤甚柱人朕甚憫之夫五刑之條莫甚大辟大辟之施身首異處斯已極矣自今有犯死罪律該凌遲者依律科決其餘死罪止於斬絞法司並不許牽合傅會昧情失實以致冤濫若朕一時過於嫉惡律外用籍沒及凌遲之刑法司再三執奏三奏不允至於五奏五奏不允同三公及大臣執奏必允乃已永爲定制文武諸司自今亦不許恣肆暴酷於法外用鞭背等刑以傷人命尤不許用宮刑絕人嗣續有自宮者以不孝論且人之爲非固有父子不相爲謀者肆虐舜爲君罰弗及嗣文王之世罪人不孥自今惟犯謀反大逆者依法連坐其餘有罪止坐本身

毋得一概處以連坐之法。古之盛世，恆采民言，用資戒警。今兇險之徒，往往摭拾誣爲誹謗，法吏刻深，鍊成獄刑之失中。民則無措。今後但有告誹謗者，一切勿治。爾中外文武羣臣，宜端乃志，悉乃心，畏天愛人，務從寬恕。庶有以佐朕父母斯民之治。或有違者，必罰不貸。敷告天下，咸使聞知。洪熙元年三月十五日。

免稅糧詔

詔曰：朕承大統，主宰天下。上惟天命之重，下念生民之難。夙夜憂勞，惟恐一夫不得其所。屢詔求言，冀達民隱。而山東諸郡及淮安、徐州之境，頻歲旱潦，年穀無收。民有乏於衣食，父母妻子不得相濟，凍餒呻吟，流於道路。郡縣之官，漠不留意，而又有科買之擾。豈稱爲民父母之道哉？可全免今年夏稅。其秋糧減半徵收。自今年四月以前，各衙門一應收買及科派物件，除桑穫仍納外，其餘未到官者，盡行停罷。已到官者，從實起解，不許欺隱。若實無見物，而先已虛報在官者，亦不許再科於民，以足其數。虛報之罪，俱宥不問。其郡縣之官務，盡撫輯安養之，宜毋縱貪利以重困之。庶幾副朕憫恤黎元之意。故茲詔示，咸使聞知。洪熙元年四月初三日。

明書卷五十三

志五

綸渙志三

宣宗章皇帝

卽位詔

詔曰洪惟天眷國家茂隆景運肇自太祖高皇帝聖神文武提一旅之衆建萬世之業太宗文皇帝神功聖德載安宗社弘靖萬邦皇考大行皇帝紹承大統奉天子民體祖宗之至仁用輯寧於庶類自臨寶位夙夜勤勞甫及踰年德澤覃霈不幸違豫奄臻大漸顧命神器付予眇躬哀慟方殷罔知攸措親王文武羣臣下至耆老軍民藩夷朝使萬衆一誠累表勸進辭拒不獲仰惟列聖創守之難俯徇輿情已於六月十二日祇告天地宗廟社稷卽皇帝位爲政所重以德及人其改明年爲宣德元年大赦天下咸與維新於戲三聖在天制治保邦大經大法明照日月垂憲萬年惟篤欽承必誠必信尙賴宗室親王叔祖父協心藩屏鞏固國家暨中外文武賢臣同德匡輔用臻至理弘建宗社生民悠久之福詔告天下咸使聞知

洪熙元年六月十五日

上謚號詔

詔曰朕惟聖神之道不可以名言功德之隆必形諸贊述是以皇有羲農之號帝有堯舜之稱國之典常古今一揆恭惟皇考大行皇帝稟睿聖之資備明誠之德正位儲宮二十餘年至孝通於神明令聞孚於遠邇嗣登大寶寅奉鴻圖體天之心弘敷惠澤普昭蘇於萬彙煥寰宇之一新致理興化惇尚文雅慎修武事四境無虞天下歸仁安於熙皞不幸踰歲奄棄大寶四海臣民如喪厥考嗟予罔極之慟屬茲繼統之初諒陰敬承之心敢後追崇之典謹命在廷文武羣臣稽古禮文議薦謚號至公之道衆論攸同乃於七月初二日祇告天地宗廟社稷奉冊寶恭上皇考大行皇帝尊謚敬天體道純誠至德弘文欽武章聖達孝昭皇帝廟號仁宗嗚呼配天惟德尊親惟孝光華宣著於萬年繼述尚存於後世布告中外咸使聞知洪熙元年七月初三日

上皇太后徽號詔

詔曰仁政之務親親爲先禮典所崇尊尊爲大朕續承鴻業君臨兆庶肆用惇於孝理爰肇正於化原恭惟聖母輔翼先朝昭明內政弘六宮之壘範表四海之母儀深仁厚德施及眇躬隆鞠育之恩廣訓迪之道劬勞備至以底成立茲方奉天下之至養則必極天下之尊稱謹上皇太后乃若宗廟之祀禮重相成德化之行始於夫婦用稽國典冊妃胡氏爲皇后夫國之本在家允屬彝倫之重上以厚率下庶臻至理之隆布告中外咸使聞知洪熙元年七月十五日

平漢王詔

詔曰我祖宗開創洪業封建親藩所以鞏固國家永安宗社朕以天敍嗣承大統惇厚親親至於漢王高煦事以叔父未嘗違禮天地神明所共臨鑒而彼包蓄禍心積有年歲昔我皇祖太宗皇帝覺其潛懷異圖削兩護衛徒置樂安州皇考仁宗皇帝友愛之誠比隆虞舜而乃忘背大恩以德爲怨今者無故招聚無賴授以兵器驅掠良民塈充軍士搶奪官民馬匹擅放有司監繫強盜縱其爲惡給與賞賜暗結都司官及軍衛有司官吏生員人等賞與金銀等物除指揮王斌知州朱恆等爲太師都督尙書等官其餘各授一職散刀與真定等衛軍官爲號潛結北京官員軍民俾爲內應其他姦謀不可枚舉遂致北京官員軍民山東三司衛府州縣等衙門官吏人等及其護衛親信軍校并被害軍民五百餘人奏發其事朕以至親初未之信及差百戶陳剛齋本至京誣罔先帝爰及朕躬假此弄兵聲言犯闕及究多人之言具有成跡實欲妄覬天位謀危社稷流毒生靈春秋之法人臣無將將則必誅其不軌如此罪奚可容朕以祖宗付託之重國家生民之計不得已親率六師往問其罪兵臨其境尙擁烏合之衆敢行抗拒賴天地眷祐宗社之靈罪人斯得朕以親親之故不忍棄絕令同宮眷居於北京以全始終之恩其餘同惡者明正典刑協從者咸釋不問今已班師於戲管叔流言成周致辟淮南作擊自闕其躬大義不私於所親至仁尙從於寬典詔告中外咸使聞知

征虜大勝詔

詔曰恭天撫民固無華夷遠邇之間除殘去暴本於帝王仁義之心故拔稂莠所以植苗而斬蛇虺爲其傷物惡惡善善明聖所同朕嗣宗祖之洪圖主萬邦之兆庶志存康濟夙夜惟勤比以胡虜嘗爲邊患爰於農隙躬歷疆陲飭勵將士嚴固防守九月初二日駐師石門遽得邊報胡寇庶萬南侵豕突獸奔已迫近境朕躬率鐵騎三千馳赴之將士比力協心咸奮一當百戰馘虜首萬餘級擒其酋長百餘人徑其巢穴盡獲其人口兵器馬匹牛羊輜重不可勝計腥羶蕩滌邊境肅清遂班師振旅於戲稔惡弗戢醜虜何道於天誅武威載揚嘉兵豈予之所志庶幾攘夷之績用副保民之心詔告中外咸使聞知宣德二年九月十五日

皇太子肇生詔

詔曰朕以菲德祇膺鴻圖惟祖宗創業之艱難惟今日守成之匪易致勤夙夜罔敢怠寧億兆之繁殫心於和輯宗社之重永念於繼承善慶有源祥應茲協陽德初復長子肇生家邦之本攸隆中外之心咸屬宜施惠澤覃被多方今大赦天下於戲承序以長用昭萬世之傳推德及人弘敷四海之福故茲詔諭咸使聞知宣德二年十一月十五日

冊立皇太子詔

詔曰朕承天序祇奉寶圖惟祖宗積慶之隆衍本支於至盛惟帝王統理之道建儲子以爲先長子祿鎮日表英明天資端重比者親王文武羣臣合誠奉表請立東宮於再於三言之切至朕恭承皇太后聖諭

國家大經宜循衆議今以冊寶立祈鎮爲皇太子夫重建元良所以垂萬年之統豫定國本所以係天下之心詔告臣民咸使聞知宣德三年二月初六日

當春優恤第一詔

詔曰朕恭膺天命嗣承祖宗洪業夙夜孜孜保民圖治每食則思下人之饑每衣則思下人之寒心存民瘼未嘗忘之今春氣已和時頒寬恤之令條示於後其速行之爾六卿大臣與國同體爲國爲民務盡乃心如政令有所未當朕慮有所未周者尙審思列奏都御史任耳目之寄亦宜博訪以聞庶副朕恤民之意欽哉故諭宣德五年二月二十二日

當春優恤第二詔

朕以菲德恭承天命嗣祖宗之大統夙夜惓惓思付託之重夫君國之道保民爲要當春時和萬物發生顧念兵民有未得所祇體造化之仁爰敷懷保之政庶幾下人蒙福而有以仰答天與祖宗之心凡爾羣臣宜同朕志令行庶務勉務欽承故諭宣德七年月日

省災寬恤詔

詔曰朕以菲德恭嗣天位統御兆民夙夜惓惓圖惟安利今畿內及河南山東山西並奏自春及夏雨澤不降人民饑窘朕甚惻焉夫上天降災厥有攸自其政事之有闕歟刑罰之失中歟徵斂之頻繁歟撫字之不得人歟永念其故內疚於心思惟感通之道必廣寬恤之仁庶天鑒之旋災爲福宣德八年四月十

五日

英宗睿皇帝

卽位詔

詔曰我國家膺天明命統理華夷奄甸萬姓於茲七十餘年仰惟祖宗肇造之功守成之道規模弘遠昭示萬年惟我皇考皇帝以至仁大德統承之率循憲章恢弘正化方期家國永底雍熙不幸奄茲遐棄肆予眇躬祇奉遺命於宣德十年正月初十日卽皇帝位付畀攸重兢惕惟慄允惟神天之典惟敬斯承生民之重惟仁斯保阜成之績惟勤惟儉乃克有成顧予涼薄勉懷永固尙賴親王宗室益修藩屏中外文武羣臣宣力效忱以副委任以惠我蒼生用臻富庶躋於太和其以明年爲正統元年與天下更新嗚呼自古生民獲福咸由君臣同心同德圖厥成功亦罔不在初尙協嘉猷以隆邦本詔告天下咸使聞知宣德十年正月初十日

上謚號詔

詔曰朕惟隆古神聖之君咸有鴻名美謚垂於萬世若唐堯虞舜皆所以形容至德逮我祖宗莫不皆然恭惟皇考大行皇帝續承天位統理邦家弘覆載之仁溥生成之德至誠孚於上下至孝通於神明寬裕有容神武不殺華夏蠻貊罔不率俾薄海内外熙然泰和不幸上賓奄棄臣庶顧以大寶付於眇躬懷哀慟之孔深念繼述之彌重允惟典禮宜極追崇謹命文武羣臣稽古禮文議薦謚號參之衆論協於大公

乃於正月二十五日祇告天地宗廟社稷奉冊寶恭上皇考大行皇帝尊謚憲天崇道英明神聖欽文昭武寬仁純孝章皇帝廟號宣宗於戲天地之德實廣大而難名日月之明同昭宣於有永詔告天下想宜知悉宣德十年正月二十八日

上太皇太后及皇太后號封王詔

詔曰朕以眇躬嗣登大寶稽古帝王致理之要亦惟尊尊親親表正大倫封建宗藩鞏固王室厥有彝典萬世攸同仰惟聖祖母皇太后大德格天錫之全福以濟我家國保佑朕躬聖母皇后協相先朝用固邦本徽音嗣著大典攸崇謹上冊寶尊聖祖母皇太后爲太皇太后聖母皇后爲皇太后復念本支實資藩屏今冊封弟祁鈺爲鄖王平陽王美圭嗣封晉王保寧王悅薨嗣封蜀王其餘郡王應封襲者次第頒封於戲崇孝敬以隆天敍之尊敦宗室以重維城之寄爰推仁澤咸及庶邦詔示中外咸使聞知宣德十年二月初九日

水旱省示詔

朕躬嗣大統夙夜祇勤惟天惟祖宗付託之重不敢怠逸比年以來停罷一切徵斂除逋負薄刑罰所冀四方咸遂生息今歲以來災沴數見京畿尤甚自三月至五月亢陽不雨甚傷農麥五月中至六月連雨不止河決隄防淹沒田稼城中傾塌官民廬舍亦有壓溺死者深用兢惕洪範咎徵皆由人事蓋朕不德之所致也其聽納之弗審歎讒佞之弗戢歎政事之臣有頗僻歎輔弼之臣失其職歎何災特甚乎近也

循省厥由用圖善道爾等皆與國同體豈當默默坐視而弗思弗勉乎自今其體朕心以敬天愛人爲心毋懈夙夜夫持廉戒貪者善身之本致公絕私者善政之要勿謂可欺神鑒孔昭勿謂無害天應可畏欽哉勗哉務修善政庶幾以回天意以固宗社生民之福爾亦尚有利哉正統四年六月二十二日

寬恤詔

詔曰朕以眇躬嗣承大統仰惟天眷之隆祖宗創守之艱夙夜祇慎用圖政理以寧萬邦一切不急之務悉已停罷尙冀羣生樂業上協天心切慮民情幽隱庶職未盡得人承流宣化有所不至深歉於懷茲當春和萬物發舒吾民或有不得其所者悉從寬恤以遂其生爾外臣僚體朕心盡乃職務求實效勿事虛文嗚呼天地以生物爲心國家以養民爲政尙圖成績用底雍熙詔告臣民咸宜知悉正統四年三月初一日

御朝詔

詔曰朕以菲德祇膺天命嗣祖宗大統主宰天下夙夜思念開創惟艱繼承匪易誠以疆宇之廣億兆之衆一人失所過實自予肆臨御以來志存安利寢食弗安比者敬循祖宗之舊建奉天華蓋謹身三殿乾清坤寧二宮禮典宜備尙慮煩民迺材因素有費悉公出人悅趨事聿告成功已於今年十一月初十日御正朝臨羣臣瞻言居正而安宜有及民之澤於戲惟君以仁民爲事天之本惟臣以仁民爲事君之忠臣民欽體於深仁黎庶咸臻於至治敷告中外悉使聞知正統六年十一月初一日

冊后詔

詔曰朕以天敍祇承大統君臨海宇子育兆民仰惟隆古帝王政由彝教禮謹大婚茲承聖祖母太皇太后聖母皇太后命慎簡賢淑作配朕躬謹昭告天地宗廟以正統七年五月十九日冊錢氏爲皇后正位中宮共承宗祀協贊化理敷告中外咸使聞知正統七年五月二十一日

殿災詔

詔曰朕以涼德祇承祖宗鴻業顧惟艱大罔敢怠遑乃正統十四年六月初八日南京謹身等殿災此誠上天垂戒國家朕深思咎省躬夙夜警懼允惟敬天之寶必以敷仁爲先其大赦天下咸與維新於戲惟辟奉天誕布生成之德惟民歸極溥承曠蕩之恩詔告臣民咸使知悉正統十四年六月二十一日

冊立皇太子

郕王攝政詔

詔天下邇因虜寇犯邊毒害生靈皇帝恐禍連宗社不得已躬率六師往正其罪以安國家不意被留賊庭尙念臣民不可以無主茲於皇庶子三人之中選其賢而長者曰見深立爲皇太子正位東宮仍命郕王爲輔代總國政撫安天下於戲國必有君而社稷爲之安君必有儲而臣民有所仰布告天下咸使聞知

景皇帝

卽位詔

詔曰朕以皇考宣宗章皇帝仲子奉藩京師比因虜寇犯邊大兄皇帝恐禍連宗社不得已親征敕眇躬率百官居守不幸車駕誤陷虜庭我聖母皇太后務慰臣民之望已立皇庶長子見深爲皇太子命朕躬輔代總國政皇親公侯伯暨在廷文武羣臣軍民耆老四夷朝使復以天位久虛神器無主人心遑遑莫之底定合辭上請早定大計皇太后以皇太子幼沖未遽能理萬幾移命眇躬君臨天下會有使自虜中還者口宣大兄皇帝詔旨宗社之禮不可久曠朕弟郕王年長且賢其令繼統以奉祭祀顧痛恨之方殷豈遵承之遽忍雖避讓再三而愈允莫獲仰惟付託之至重敢以涼薄而固辭已於九月初六日祇告天地宗廟社稷卽皇帝位遣使詣虜問安上大兄皇帝尊號曰太上皇帝徐圖迎復爲政之道必先正始其以明年爲景泰元年大赦天下咸與維新於戲惟敬仁誠可以安宗社惟恭儉勤可以惠萬民尙賴宗室叔祖叔父協心藩屏爰暨中外文武賢臣同心匡輔弘濟重大之艱永隆雍熙之治布告天下咸使聞知正統十四年九月初六日

勝虜詔

詔曰朕以涼德嗣承大統仰惟祖宗創業之艱宵旰孳孳勉圖治理重以大兄太上皇帝鑾輿未復痛恨日深方詰兵數十萬欲問罪於虜而虜使來迎復者屢皆詐太上皇帝詔旨謂若重遺金帛以來虜必款送還京朝廷固疑其誑而於理難辭乃悉勉從之柰何其計愈行而誑愈篤乃十月十五日也先悉衆躬

詣城下仍以請迎講和爲詞朕遣大臣出迓徧歷虜營不見大兄鑾輿所在遂焚書斬使揮六師搗之斬獲其類無算虜衆大潰乘夜奔遁餘孽散伏於近郊者亦皆以摵戮無遺京師內外爲之帖然尙慮四方遠近罔聞克捷猶懷驚悸耕鑿未遑室家靡定無以慰安人心特茲詔示其各復爾舊寧爾生永彰殺伐之功共樂雍熙之治布告中外咸使聞知正統十四年十一月初九日

上太后號冊后詔

詔曰朕以眇躬托於億兆臣民之上罔知治理夙夜匪寧顧惟德禮有未惇庸將無以道國家天下蓋德必先於隆孝而禮惟重乎正名帝王所同彝倫斯在況恩施於己者有莫大宜尊歸於親者無以加義所當然事豈惟過謹上尊聖母皇太后曰上聖皇太后生母曰皇太后勉遵辭讓之旨奉遷皇太后居仁壽宮以俟大兄鑾輿之復進皇太子母周氏爲貴妃示重天下之本冊朕妃汪氏爲皇后以厚大倫之原夫帥天下以仁固本於親親然由親親而推又在於仁民於戲愛敬盡於事親而德教加於百姓非朕所及然切於中雖勉力協和之弗周期同德於變之靡間詔告中外咸體朕懷正統十四年十二月初十日

太上皇帝告羣臣詔

朕以不明爲權奸所誤致陷於虜庭已嘗寓書朕弟嗣皇帝位主典神器奉承宗祀此古今制事之宜帝王執中之道朕今幸賴天地祖宗之靈母后皇帝憫念之切俾虜悔過奉送還京郊社宗廟之禮既不可預國家幾務之重朕弟惟宜爾文武羣臣務悉心以匡其不逮以福蒼生於無窮朕到京日迎接之禮悉

從省約布告有位咸體朕懷景泰元年八月十五日

上太上皇帝號詔

詔曰朕奉先帝聖體之遺適值國家中衰之運痛幾務擅專於權倖致大兄誤陷於虜庭賴天地祖宗眷佑之隆荷母后臣民付托之重授朕大位俾紹鴻圖慰安人心奉承宗祀雖神器有可保柰皇業以多艱胡虜內侵蠻苗外擾方茲攘除已定尙猶宵旰靡寧顧滅賊之難威恩以誠而懷怨肆屢遣人重齋金帛投虜所好迎復大兄柰頑梗而弗悛豈怨讐之可匿方圖大舉遽見彰聞逆虜革心翻然畏服乃自今年七月以來遣其親信伏闕朝貢固請講和至於再三悔見乎辭款浮於過朕不得已爲親而屈厚加金帛選使偕行敢謂德可動天自信誠能化暴乃八月十六日其太師也先果遣五百餘騎奉送大兄還京臣庶交懼宮庭胥慶然朕卽位之初已嘗祇告天地宗社上大兄尊號曰太上皇帝禮惟有隆而無替義當以卑而奉尊雖未酬復怨之私姑少遂厚倫之願爰推恩典溥及臣民於戲雪恥不以威而以德誠有仗宗社之靈遺民不於勞而於安志在益家邦之福尙賴叔祖叔父羣臣賢哲匡朕躬於不逮庶幾華夏蠻貊四方遠邇臻至效於無窮布告中外咸體朕懷景泰元年八月十九日

冊立太子詔

詔曰朕以涼薄躬際艱危賴天地祖宗眷佑之隆膺母后臣民付戴之重嗣臨大寶安固家邦方負荷之弗勝豈授承之敢慮而皇親公侯駟馬伯及在廷文武羣臣乃合詞上請以爲天祐下民作之君實遺安

於四海。父有天下傳之子。斯固本於萬年。此三代之聖謨。誠百王之懿範。謂朕長子序在倫先。宜正東宮。以明繼體。事方聞於聖母。遽見允於輿情。復以皇后之謙冲。固遜軒龍於有子。再三陳懇理。順名端肆。循慈訓之諄。兼遂賢情之切。乃於五月初二日冊朕長子見濟爲皇太子。其母杭氏爲皇后。大本既正。彝倫亦明。親親之誼。猶所當敦。太上皇帝長子見深。特更封爲沂王。次子見清。爲榮王。見淳。爲許王。同屏國家。衛安宗社。爰推恩於遠邇。庸資弼於臣民。於戲。綱常正而家道雍。式弘敦於化本。儲副專而國統續。庶永固於基圖。布告臣民。體予至意。景泰三年五月初二日。

英宗睿皇帝

復卽位詔

詔曰。朕昔恭膺天命。嗣承大統。十有五年。民物康阜。不虞北虜之變。惟以宗社生民之故。親率六師禦之。而以庶弟郕王監國。不意兵律失御。乘輿被遮。時文武羣臣既立皇太子而奉之。豈期監國之人。遽攘當寧之位。旣而皇天悔禍。虜酋格心。奉朕南還。旣無復辟之誠。反爲幽閉之計。旋易皇儲而立己子。惟天不佑。未久而亡。杜絕諫諍。愈益執迷。矧失德之良多。致沈疾之難療。朝政不臨。人心斯憤。迺今月十七日。朕爲公侯駙馬伯及文武羣臣六軍萬姓之所擁戴。遂請命於聖母皇太后。祇告天地社稷宗廟。以今年正月十七日復卽皇帝位。躬理庶務。保固邦家。其改景泰八年爲天順元年。大赦天下。咸與維新。於戲。多難興邦。高帝脫平城而肇漢殷。憂啓聖文王出羑里以興周。天位旣復於其正。人心由是以咸安。咨爾萬方。

臣民同秉忠誠會歸皇極弼予政理永享太平布告天下咸使聞知天順元年正月二十一日

復立太子詔

詔曰朕惟帝王之傳序乃國家之大經建元良所以尊祖宗而重社稷封羣胤所以壯藩屏而隆本支今古攸同典章斯具茲朕躬膺天命之申復登大寶之位顧惟不腆事有未遑而公侯駙馬伯及文武羣臣僉謂朕之元子當復正位於東宮其次諸子宜悉封於藩國朕以請之聖母皇太后允從衆議舉行盛禮乃於天順元年三月初六日冊立元子見濡爲皇太子及封第二子見濤爲德王第三子見澍爲秀王第四子見澤爲崇王第五子見浚爲吉王於戲承祧主器得其人則國本正而萬邦以貞祚土疏封守其世則藩輔完而大統以定天下之心斯有所繫宗社之計永底於安故茲詔告咸使聞知天順元年三月初六日

寬恤建庶人敕

朕恭膺天命復承祖宗大統夙夜憂勤欲使天下羣生咸得其所而況宗室至親者哉爰念建庶人等自幼爲前人所累拘幽至今已五十餘年憫此遺孤特從寬貸用是厚加賞賚遣人送至鳳陽居住月給廩餼以安其生仍聽婚婢以續其後庶副眷念親親之意故諭天順元年十二月十六日

上太后尊號詔

詔曰朕惟爲治莫先於孝而孝莫大尊親自古帝王德教加於百姓刑於四海者率由此道也朕以眇躬

續承丕緒仰惟聖母皇太后生成厚恩曷云能報曩予嗣位之初屬在幼冲罔知攸濟惟我聖母勞心訓育俾克繼述用底乂寧迨居南宮危疑之間亦惟我聖母憂勤保護賴以無虞及內難將萌遂伸大義俾予復位奠安宗社康濟生民功德兼隆迴超載籍用是博採公義表著徽稱乃於正月二十日率文武羣臣謹奉冊寶上尊號曰聖烈慈壽皇太后特遣非常之慶庸昭錫類之心於戲推之而準允惟政治於家邦動之斯和尙冀風行於天下天順二年二月二十二日

誅姦詔

詔曰我國家受天明命以至仁大德撫有四海列聖繼統傳序在子致治保民蓋有年矣暨予中歷險艱賴天眷人歸復正大位維時內官吉祥武官石亨等偕衆迎復掩爲己功朕信之不疑厚以爵賞官其子弟各數十人而彼肆欲無厭讐於貨利結爲表裏竊弄威權少疏抑之輒懷異志然石亨事敗已正典刑而優寵吉祥無異平昔不期吉祥衷惡落姦日甚一日與姪男曹欽等陰養死士謀爲不軌乃於今年七月初二日早遽行反逆戕害朝臣焚毀禁門罪惡滔天神人共憤朕卽時命將發兵誅之元兇授首同惡悉除浹日之間都城清肅此實上天垂佑之靈宗社無疆之福也夫武以戡亂愧未發於先機仁以惠民期益臻於至治於戲戡定之後事莫急於變通變通之宜治莫先於仁惠惟爾中外臣庶各究乃心體予至意天順五年七月初十日

上諡號詔

詔曰朕惟有大功德者必有徽稱以垂永久稽諸典禮萬世攸同仰惟皇妣聖烈慈壽皇太后至仁大德本於天性配我皇考克敦化原誕育朕躬恩勤備至朕自幼沖嗣位以至於今前後幾三十年賴我皇妣訓誨維持底於成立用能奠安宗社輯寧邦家不幸奄達至養哀慕無窮重惟罔極之恩宜舉尊崇之典謹命禮官議薦徽號博採輿論協於至公已於十月初七日祇告天地宗廟社稷恭上皇妣尊諡曰孝恭懿憲慈仁莊烈齊天配聖章皇后嗚呼盛德難名曷表尊親之孝光儀具在永垂裕後之休布告中外咸使聞知天順六年十月初十日

寬恤詔

詔曰朕仰荷上天眷命子育萬民民之戚休恆存念慮願惟畿內去冬少雪今春缺雨四方之遠亦恐或然夫天時既已違和斯地利必有未盡吾民衣食何所自出興言及此良深憫惻欲慰羣情之望宜加寬恤之仁況修德弭災厥有彝典冀爾中外羣臣咸體朕心勤政保民用臻康樂庶天降靈協於至和於戲代天理物爰推一念之誠節用愛人用錫萬邦之福詔告中外咸使聞知天順七年三月十三日

憲宗純皇帝

即位詔

詔曰洪惟我祖宗誕膺天命肇開帝業爲生民主幾百年矣聖聖相承志勤於治武功文德紹體前聞暨我皇考皇帝恢弘政治二紀於茲厚澤深仁有以衍皇明萬世無疆之祚不幸奄茲遐棄遺命神器付於

眇躬顧哀痛之方殷奚遑忍於繼承而親王文武羣臣及耆老軍民累表勸進誠切意堅朕不得已仰遵遺命俯徇輿情於正月二十二日祇告天地宗廟社稷卽皇帝位自惟涼薄勉懷永圖嘉與中外親賢率循至道惟敬是持惟誠是立惟仁義是行惟古訓成憲是式庶臻於治康我兆民其以明年爲成化元年大赦天下於戲體元居正宜宏經世之規發政施仁用錫普天之澤尙賴宗室親王文武賢臣協德一心恭勤乃事以弼予於至治詔告中外咸使聞知天順八年正月二十二日

上諡號詔

詔曰朕惟自古英君義辟咸有美諡垂示方來若二帝三王以及後世之賢主莫不皆然乃國家之茂典不易之令猷也恭惟我皇考大行皇帝以英武之資剛健之德嗣守祖宗之鴻業躬勤政務於萬機至孝通於神明洪恩被於黎庶嚴百神之祀享重賢士之登庸志協羣情智周萬慮誕敷文命慎簡兵戎立經國之遠圖興治古之盛事華夏蠻貊罔不歸心四海九州臻於熙皞不幸奄棄臣民哀慟曷已允惟宗室之託深思負荷之艱矧繼述之方殷顧追崇之敢後謹命在廷文武羣臣稽古禮文議薦諡號參之衆論合於至公乃於二月十二日祇告天地宗廟社稷奉冊寶恭上皇考大行皇帝尊諡法天立道仁明誠敬昭文憲武至德廣孝睿皇帝廟號英宗嗚呼聖德允合於乾坤神功光垂於宇宙豈名言之可罄尙不顯於無窮布告遐邇咸使知悉天順八年二月十五日

尊母后母妃詔

詔曰朕惟大孝尊親著於典禮是以自古聖帝明王之有天下者靡不以尊親爲重而亦未嘗不致隆於所生傳序在予祇循敢後仰惟母后以坤德之懿配我皇考昭宣化源而嬰疾有年燕禩弗兆於時贊理宮闈相成宗祀與所以迓續天休而隆邦本者實我母后之功之德是賴內治雍睦皇考鑒焉予一人躬承兩宮訓育至於有成嗣統之初敢忘圖報夫欲兼隆於至養固宜各極於尊稱是用率籲衆心參稽古誼謹上冊寶尊母后皇后曰慈懿皇太后尊母妃皇貴妃曰皇太后至情大義庶幾兩盡無違然孝旣盡於尊親仁當推以逮下於戲養以天下永惟二聖之尊福被後人懋衍萬年之慶布告中外咸使聞知天順八年三月初二日

冊后詔

詔曰婚姻正始人道所重朕大婚之期先帝有成命矣遽焉卽吉誠所未安茲者親王廷臣累辭以請而聖母慈懿皇太后皇太后慈訓加切咸以繼承之重爲言義旣有在朕敢固違謹昭告天地宗廟以天順八年七月二十一日冊立吳氏爲皇后正位中宮以共承宗祀奉養慈闈庶惇彝倫用化成於天下敷告中外咸使聞知天順八年七月二十四日

改冊后詔

詔曰帝王爲始莫先正家正家之道必自大婚始惟先帝臨御之日嘗爲朕簡求賢淑已定王氏育於別宮以待期矣迨至憑几顧命猶以婚期責成有司朕於時執禮彌甚未敢遽從矧敢與知其事不意內臣

牛玉偏徇己私。朦朧奏請皇太后。將已退吳氏。復選冊立。禮成之後。朕觀吳氏德不稱位。因察其實。始知非預定者。夫既遵先帝之命以成禮。而乃違命立非其人。何以表宮闈而相宗祀。與言及此。內疚於心。用是不得已。請命母后。明正牛玉之罪。廢黜吳氏。不敢以歲月緩。自念與其非人。寧虛厥位。而在廷文武羣臣。再三陳請。謂中宮不可久虛。義正詞切。朕難固拒。今勉從所請。仍遵先帝成命。冊立王氏爲皇后。於戲。自古人倫。有常有變。變而得正。何憚弗爲。茲朕是舉。匪獨正家。抑恐上負先帝選授之命。於心有不安焉。誕告多方。使明知朕意。天順八年十月十五日。

上皇太后謚詔

詔曰。朕稽古聖君治隆孝道。固謹於其始。尤嚴於其終。是以薦徽稱。垂永世。實今所當遵用也。惟我皇妣大行慈懿皇太后。配我皇考英宗睿皇帝。正位坤宮。殆將二紀。逮於紹休聖緒。尊奉母儀。並膺至養。亦閱五載。懿範仁恩。自家刑國。宜壽萬年。而遽爾升遐。思罄送往之誠。惟崇媲美之號。是用博采廷議。於七月十九日。祔告天地宗廟社稷。恭上尊謚曰孝莊獻穆弘惠顯仁恭天欽聖睿皇后。於戲。陵廟祔於先皇。允符天地高厚之配。聲名溢於中國。施及日月。照臨之區。播告遐邇。咸使知悉。成化四年七月二十二日。

彗星見詔

詔曰。朕嗣無疆大歷服。夙夜祗畏靡敢怠遑。然德服加隆。政弗臻治。荷天心仁愛。屢出災異以示儆焉。迺九月朔以來。星芒垂象。逼台掃斗。威譴尤切。朕慄焉修省。永惟斯人天之赤子。爰加惠澤。期興更新。庶幾

仰當上天眷命付朕億兆之意於戲爾中外文武之臣既俯治於人尙仰畏於天受職任事者惟義是循理兵牧民者惟仁是篤惟朕憂是分惟玄鑑是倣故茲詔誥咸使聞知

寬恤詔

詔曰朕以眇躬君臨海宇惟上天付畀之重祖宗創守之艱常懷惕厲罔敢怠荒遑豫冀民物阜康協於至治而志勤道遠厥效未彰比者災沴薦臻畿甸尤甚三時不雨一雨連旬旱澇相仍民食缺乏循省厥咎在予一人百姓何辜罹茲艱厄興言及此良用惻然夫篤近舉遠者古之規視遠猶邇者朕之志爰推憂勤之念普施寬恤之仁於戲朕體上天好生之德用加惠於吾民中外大小臣僚上體朕恤民之意務求臻於實效故茲詔示咸使聞知成化六年八月初八日

冊立太子詔

詔曰自古帝王君臨海宇必崇建元良以爲儲副此久安長治之道也惟我祖宗列聖允迪大猷承傳有序邦本既正鴻業斯隆暨朕嗣守丕圖於茲八載彝章未舉蓋有待焉長子祐極天資明粹日表英奇中和之性夙成內外之心是屬比者公侯駟馬伯文武羣臣合誠奉表請建東宮恭承皇太后聖訓茲事重大宜從衆議爰以令辰舉行彝典授祐極以冊寶立爲皇太子正位東宮用篤邦家之祐衍宗社無疆之休大禮既成輿情交慶宜敷霈澤覃被萬方於戲元良正位繇大統於萬年曠蕩推恩均至仁於四海詔諭遐邇咸使聞知成化七年十一月十六日

災傷寬恤詔

詔曰朕紹祖宗鴻業爲天下生民主夙夜憂勤用圖康濟柰近年以來旱澇相繼歲數不登加以今春亢旱爲虐京畿州縣被災者多而山東濟南等六府河南彰德一府災傷尤甚人民缺食十常八九守臣以告朕心惻然夫民生不遂實司牧之過如又坐視其饑窘困窮而不顧豈爲民父母之道哉用是發倉儲出內帑弘施寬恤之仁少慰黎元之望凡爾居官食祿爲朕牧民者務加意賑恤毋生事煩擾乃諭吾民鄰里相救有無相通共濟艱厄以俟秋成有積者毋閉籬自私乖救急之義窮乏者毋流移轉徙放縱非爲以重害而生於戲憂民之憂朕心良切故茲詔示咸使聞知成化九年四月十七日

再冊立太子詔

詔曰帝王誕膺景命必建儲闈所以重宗社之承正邦家之本此古今通制也朕丕纘令績祇後永圖旰食宵衣不遑自逸允惟七鬯之主實繫臣民之心庸舉盛儀以慰羣望皇子祐樘聰明天賦睿智夙成孝本因心禮皆中度朕遠稽古昔近法祖宗覽羣臣請建之章奉聖母從衆之訓遂授冊寶立祐樘爲皇太子正位東宮衍寶祚於萬年隆本支於百世弘施慶澤覃被寰區於戲正元良之位式副輿情推曠蕩之恩用敦博愛詔告天下咸使聞知成化十一年十一月初八日

復鄭王帝號詔

朕叔鄭王踐祚戡難保邦奠安宗社亦旣有年及寢疾臨薨之際姦臣貪功生事妄興讒構請去帝號先

帝尋知誣枉深懷悔恨以次抵姦於法不幸上賓未及舉正朕嗣成大業於茲一紀每思先儒有言祖父有欲爲之志而未爲子孫善繼其志而成就之此所謂孝間以帝號之復質諸聖母皇太后亦云此先帝本意宜卽舉行朕祇服慈訓敦念親親誕告在廷用成先志其鄭王可仍舊皇帝之號所有尊謚禮部會議以聞務合人心毋乖典禮仍令所司修飾陵寢如敕奉行故諭成化十一年十二月十三日

災異寬恤詔

詔曰朕紹祖宗大位撫御萬方思惟負荷之艱罔敢自遑自豫然而治效未著災沴迭興地道弗寧天時亢旱土無所演朕切憂惶嘗齋心懇禱遣廷臣祭告山川柰歲竟不登而河南山東畿內率多饑饉陝西山西尤劇至有棄恆產室家不相顧者元元何辜罹茲危阨朕爲民主可憇然莫之愍耶累博采羣議發內帑倉儲敕所在官司多方賑濟期此今人咸歸樂土不意冬暮春初兩次星變有聲朕愈兢惕載敕廷臣備陳時政得失采納而行用以下慰民望上答天心方春和時萬物發育祇承乾元資始之仁誕敷寬恤天下之典成化二十一年正月初七日

上皇太后徽號詔

詔曰朕惟古帝王之孝親匪惟養以天下而必尊以鴻名蓋所以表功象德顯於今而垂於後也情文咸具敢忘祇循恭惟聖母皇太后夙贊先聖茂隆內治誕毓眇質續紹丕圖迄今二紀宗社奠安海宇寧謐實皆聖母深仁洪慈訓迪之所致也矧於皇太子勤劬長育用底有成家室攸宜國本深固凡茲勳德超

軼千古而尊崇元禮尙未加隆朕心歉焉乃稽彝典率籲臣工以今月十七日謹奉冊寶上尊號曰聖慈仁壽皇太后仰酬罔極之恩遠追帝王之孝禮既成於家國澤斯溥於寰區於戲據古尊稱式廣親親之教授今恤下誕敷老老之仁詔告中外咸使聞知成化二十三年四月十九日

明書卷五十四

志五

綸渙志四

孝宗敬皇帝

卽位詔

詔曰惟我祖宗聖聖相承膺天明命爲華夷主創業守成神功聖德誠度越往古矣暨我皇考大行皇帝嗣統深仁厚澤覆冒海宇二紀於茲而憂勤求治之心猶宵旰靡遑因臻遠豫遽出綵衣忍聞憑几之言猥以神器之屬哀疚方殷罔知攸措時親王文武羣臣下及耆老軍民合詞伐闕勸進者至於再三辭拒弗獲乃遵遺命以九月初六日祇告天地宗廟社稷卽皇帝位顧茲付畀之重深懼仔肩之難勉圖弘濟一惟恢張治道惠綏黎元用底阜成躋於熙皞庶衍皇明億萬年無疆之祚其以明年爲弘治元年夫當居正體元之初宣布更新欽恤之典於戲祖宗皇考大經大法啓佑我後人者纖悉具至繹思體行在予眇躬尙賴遐邇宗親內外忠良同德一心恪恭乃事以輔予之不逮誕告多方咸使聞知成化二十三年

九月初六日

上謚號詔

詔曰。自昔帝王功德隆盛。皆有美謚。以詔垂於萬世。此不易之令典也。洪惟皇考大行皇帝英資神聖。至德寬仁。早主鬯以繫人心。繼定位而正天序。緝熙聖學。躬勤政教。法祖敬天。尊親致養。恩誼篤於宗室。惠澤溥於黎元。舉賢能而疏遠無遺。慎兵刑而威德宣布。歷年二紀。治底雍熙。華夏戎夷。罔不歸戴。揆茲功德。邁古帝王遠矣。不幸奄爾上賓。臣民慟慕。顧予哀疚彌切。敢緩追崇。謹命在廷文武羣臣。稽古禮文。議薦謚號。博參輿論。允協至公。乃於九月十九日。祇告天地宗廟社稷。奉冊寶恭上皇考大行皇帝尊謚曰。繼天凝道。誠明仁敬。崇文肅武。宏德至孝。純皇帝廟號憲宗。嗚呼。乾坤高厚。曷能擬其形容。日月光華。尙同顯於悠久。布告中外。咸使聞知。成化二十三年九月二十二日。

尊太皇太后皇太后冊皇后詔

詔曰。孝莫大於尊親。政必先於正名。禮典俱存。古今攸重。朕恭承丕緒。統御華夷。務惇敍於天倫。式恢弘於化理。仰惟皇祖母聖慈仁壽。皇太后懿德配天。慶鍾先帝。茂隆國祚。保育朕躬。聖母皇后貞靜柔慈。含弘光大。賢踰樸木。愛軼螽斯。肆予克底有成。實賴二聖撫迪。擬佑所致也。厚德深仁。罔極莫報。允惟兼養。號皇祖母曰聖慈仁壽太皇太后。母后曰皇太后。乃若相禋助養。必資內德之賢。爰冊妃張氏爲皇后。用襄內治。表正中宮。大禮既成。湛恩斯溥。於戲。立愛惟親。德教弘敷。於四海。正家有道。皇祚茂衍。於萬年。誕

告多方咸知朕意成化二十三年十月初十日

星變敕

朕嗣承祖宗大統三年於今雖夙夜孜孜究圖化理而績効未著心恆歎然茲者上天垂戒彗星見於天津朕甚憂之循省咎徵莫測所自豈朕德涼薄行事乖違天特示異以警之歟抑邪慝將萌兆驗先見天故動威朕思所以消弭之歟抑亦政多缺失君民困苦朕與爾文武羣臣交修之道未至而惠下不敷歟惟事關朕躬者朕已齋沐告天省己修德期消變異而爾等食朕之祿實同休戚可不痛加警省歟今各宜修舉職業毋或因循懈惰廉慎節操毋或背公徇私凡軍民利病時政得失可以興革張弛者爾文武大臣并科道官仍條奏來聞務在切實可行於國有益庶幾上下協盡交修之道而人心欣慰天意可回矣其勉之慎之故諭弘治二年十二月初四日

慎刑敕

朕惟刑以輔治用之貴得其平刑平則善有所勸惡有所懲而人心服天道和不平則不足以懲惡勸善而人心不服天道乖災變之來誠有不能免焉曩因天道示異曾敕天下諸司審錄重刑發落遇情可矜疑及準辯者奚翅數十百人雖曰勿拘成案原官亦不坐罪此特廣仁愛之意欲全民命爾其間實有訊鞠不眞而失入可罪者然亦有無可矜疑而強爲出脫者要之皆非大中至正之道茲當萬物發育生長之時朕體天地好生之德以爲刑者民命所繫與其寬之於終孰若謹之於始故特戒敕爾等各加謹慎

仍行南京三法司及天下大小問刑衙門。今後問刑之際。務必存心以仁恕持法以公平。察辭辨色詳審其情罪所當重者重之以懲惡毋務姑息而不顧縱惡長奸之非。罪所當輕者輕之以宥過毋事苛刻而致有抑鬱稱冤之歎。其或證驗無憑情隱難明者尤當加意推究毋或傅致於時而冀不坐罪於他日。如此庶不背古聖人欽恤之訓而於朕刑期無刑之治亦有裨益焉爾等其欽承之毋忽故諭弘治四年二月二十四日。

元子誕生詔

詔曰朕承祖宗鴻業君主華夷於今四載深惟德有未修澤靡下究無以安養元元恐負祖宗之付託用是夙夜憂勤勉圖化理罔敢怠遑茲者荷蒙上天錫祐福慶駢□祖考垂休本支茂衍乃於今年九月二十四日皇后正宮誕生元子神人胥慶遐邇同懽上有以慰聖祖母之心下有以副中外臣民之望惟人心之和輯世道斯隆惟宗社之靈長國本愈固詔天下咸使聞知弘治四年十月十二日。

冊立皇太子詔

詔曰帝王統御天下必立儲副以定國本繫人心斯能長治久安而嗣鴻業於無疆也朕繼祖宗天序登極五年夙夜憂勤恭膺天眷元子厚照軒龍毓秀資表異常福慶攸鍾華夷均戴茲者皇親公侯駟馬伯文武羣臣累表率籲勸請立儲朕俯鑒悃誠仰承慈訓皆謂主器不可以久虛輿情不可以固拒事在當舉理難終辭爰擇日祇告上下神祇授厚照以冊寶立爲皇太子正位東宮益增九廟之光丕衍萬年之

祚國家大典中外同歡宜敷茂恩用慰願望於戲元良建而萬邦以貞治隆熙皞解澤降而率士斯潤化
治織洪詔告多方咸使知悉弘治五年三月初八日

清寧宮災詔

詔曰朕祇承天序嗣祖宗鴻業一紀於茲宵旰憂勤罔敢逸豫而位育之效猶有未臻累歲以來災異相
仍近者清寧宮之火其變尤甚朕心兢懼若切淵冰意必人事下乖斯天道上應其或舉措違宜刑賞靡
當時弊滋積民隱莫伸或賦役頻繁侵漁太急困窮鰥寡日不聊生以致然歟朕深居九重雖慮周天下
而耳目有不逮恩澤有未宣服念踰時益增悔艾已敕文武羣臣同加修省茲特誕敷渙號普及黔黎俾
覆幬之區均沾德惠庶慰渴懸之望永祈眷佑之休於戲虞書以好生爲德尙體天心夏訓以固本爲言
必先民事詔告中外咸悉朕懷弘治十一年十二月二十一日

武宗毅皇帝

卽位詔

詔曰惟我皇明誕受天命爲天下民物主祖宗列聖鴻規大訓傳在子孫皇考嗣統十有八年深仁至德
覃被海內治化之盛在古罕聞間復憫念民窮勵精新政訪求利弊方將大有興革綸音未布遽至彌留
叩地籲天無所逮及天下之慟矧予一人比者親承遺命謂主器不可久虛而宗親文武羣臣軍民耆老
累箋勸進拒之至再情意懇切永惟宗社重寄不敢固辭謹以是月十八日祇告天地宗廟社稷卽皇帝

位顧國家創造之難眇躬負荷之重惟正道是遵惟古訓成憲是守率皇考未終之志擴而行之康我兆民登於至治其以明年爲正德元年大赦天下與民更始於戲天位至大民事多艱尙賴中外臣僚協心匡輔以裨朕之不逮用克紹業共保億萬年無疆之休誕告萬方咸使知悉弘治十八年五月十八日

上謚號詔

詔曰朕惟帝王大行受大名考德定謚薦於宗廟播於無窮者古之制也洪惟我皇考大行皇帝以聖德膺天命嗣大歷服越十有八年敬天法祖尊親睦族親賢愛民之心靡所不至用是民生又安海宇寧謐治理之盛超軼往古於前烈有光焉乃者昊穹降割龍馭上賓中外臣民銜戀恩德攀號莫逮顧於沖人肇繼鴻業時方在疚禮樂之事多所未遑茲當視朝之初首稱殷禮謹命在廷文武羣臣稽古儀薦謚號博參衆論協於至公於六月初七日祇告天地宗廟社稷奉冊寶恭上皇考大行皇帝尊謚曰建天明道誠純中正聖文神武至仁大德敬皇帝廟號孝宗於戲天地之無窮也而有高明博厚之稱惟是盛德難名舉其大者用上配列聖永貽億萬年廟饗之休布告遐邇並宜知悉弘治十八年六月初十日

上太皇太后皇太后徽號詔

詔曰朕承皇考遺德誕嗣丕基夙夜兢兢懋圖化理顧治本於孝雖至貴必有所尊粵稽古昔聖帝明王暨我祖宗列聖罔不率而行之予何敢後恭惟聖祖母皇太后深仁厚德母儀天下徽音令聞亘古罕比予沖人獲底成立實維慈訓是賴聖母皇后德由天賦道合坤元內治允修克儼皇考用集無疆之慶鍾

於眇躬非各極尊稱何以申罔極之報茲卜以八月初二日率領文武臣工謹奉冊寶恭上聖祖母尊號曰慈聖康壽太皇太后皇后曰皇太后庶情文兼至孝思惟則以成隆古之治以紹我祖宗列聖之鴻休於戲立愛惟親成一人之達孝施恩有序得萬國之歡心誕告多方俾咸知悉弘治十八年八月初四日

討安化王詔

詔曰自古帝王法天立政布德明刑不可偏廢朕嗣位以來仰荷上天祖宗付託之重勵精圖治越五年念惟世久承平人多玩法振起綱維剗革姦弊相與斯人登於至理而有司不能悉體朕心奉行過當虛懷徒切和氣弗臻乃自今春以來亢旱爲厲時雨愆期風霾屢作異星迭見四川湖廣等處寇盜縱橫撫捕未定而陝西寧夏都指揮何錦等戕害守臣拒殺官兵屠戮居人謀立安化王寘鐸爲主出給印信票帖招誘諸路索要軍馬地圖各鎮官員連日奏報具有實跡爰下皇親廷臣會議僉謂寘鐸悖逆天道得罪祖宗朕不敢赦祇告太廟革其封爵削其屬籍命將出師正名討罪誅勦首惡分釋脅從撫定軍民安靖邊境尤念兵戎事重供億甚勞加以逋負相仍科徵未息在在皆然方欲省刑薄斂任賢使能培養元氣掃除災孽以保我國家億萬年之祚於戲用兵者如不得已用刑者必求其生方興問罪之師大布同仁之政播告中外咸使聞知正德五年四月二十六日

平安化王詔

詔曰朕自沖年以來嗣守祖宗大位惟敬天勤民睦族用賢是祈是念期於至治邇者寘鐸窺伺神器興

寧夏叛賊何錦等謀逆殺害鎮巡重臣荼毒兵民僞置官屬招誘各路軍馬反形已著朕祇告太廟命官致討罪人既得已下廷臣鞫問得實敕天下諸王議寘鑑罪犯其餘逆黨明正典刑及逆賊劉瑾負朕委任矯託命令捏寫旨意專權賣法累朝成憲變亂殆盡官吏軍民並受其害利入私門歸怨公府激變地方又包藏禍心私蓄兵器僞造寶印懷刃入朝謀爲不軌待時爲變亦下廷臣鞫實以正典刑數月之間二變交作兩功並成實賴天地眷佑之恩祖宗庇覆之德邦家底定中外咸和但念四海蒼生皆吾赤子或徵科苛急或刑罰刻深非徒變亂之愆抑有奉行之過歲年屢易姦弊滋多揆厥所由皆非朕意已令所司查革改正載申恩典以慰羣情通將前後事情復告於廟然後行事嗚呼天地以好生爲德人君以法祖爲心方當釐正之時載布寬仁之澤播告中外咸使聞知正德五年九月十八日

乾清宮災詔

詔曰朕恭承天命統治萬民夙夜孜孜恪尊祖訓惟以敬天勤民爲首務期於民物阜康天休滋至顧以宴安易溺舉措有乖未合天心至生災變六行愆度千里蜚蝗隕霜雨雹之非時地震天鳴之迭見水旱相繼饑饉薦臻人民困窮盜賊充斥兵馬之調發騷動近畿芻粟之轉輸役及婦女疲羸餓殍填委溝壑戰鬪死亡身膏草野勤勞或未盡甄賞義烈或未盡表揚邑井蕭條室廬楚蕩流者無所寄命歸者無所安居加之姦吏舞文貪官贋貨優卹之旨每下而廢格不行蠲免之命屢頒而催科如故朕處深宮之中念慮有所未周見聞有所未及以致民隱不能上達恩澤不能下流官民乖隔道路怨咨禍變可虞上天

示警乃於正德九年正月十六日復有乾清宮之災累朝經營一旦燐燼望之蹙額言之痛心九廟震驚六宮危惕凡我臣民罔不疑懼咎徵所自實在朕躬已齋戒薰沐虔禱於天地宗廟社稷山川跴踳敬畏惟圖自新復諭令羣臣同加修省極陳時政冀以消弭禍端仰答天譴尤念天之視聽皆自我民民心獲安天意乃順特稽舊典用布新恩惠此下民固我邦本將以延宗社萬萬年無疆之休於戲天惟顯思仁愛實存於謹告民亦勞止予惠必先於困窮惟德政之交修庶天人之協應播告中外咸使聞知正德九年正月二十六日

上太皇后謚詔

詔曰朕恪守慎終之禮將崇升祔之儀曉廷議之僉同儼天心之鑒格爰循舊典上薦徽稱仰惟皇祖妣大行慈聖康壽太皇太后淑德至仁本乎天性配我皇祖考憲宗純皇帝母儀天下餘二十年內言不出於宮闈美化自行於中外我皇考克承慈訓旣增嗣服之光予一人甚守不圖亦賴詒謀之善顧大恩之未報奄至養之終違況當擢割之中舉是追崇之典自非鴻名之稱實曷揚盛美於將來已於三月初三日祇告天地宗廟社稷恭上尊謚曰孝貞莊懿恭靖仁慈欽天輔聖純皇后嗚呼厚德難名罔極終天之念徽音不已尙垂來裔之休布告萬方俾咸知悉正德十三年三月初七日

世宗肅皇帝

卽位詔

詔曰朕承皇天之眷命賴列聖之洪休奉慈壽皇太后之懿旨皇兄大行皇帝之遺詔屬以倫序入奉廟社內外文武羣臣及耆老軍民合詞勸進至於再三辭拒弗獲謹於四月二十二日祇告天地宗廟社稷卽皇帝位深思付託之重實切兢業之懷惟我皇兄大行皇帝運撫盈成業承熙洽勵精雖切化理未孚中遭權姦曲爲蒙蔽潛弄政柄大播兇威朕昔在藩邸之時已知非皇兄之意若欲興道致治必當革故鼎新事皆率由乎舊章亦非敬承夫先志自惟涼德方在沖年尙賴親賢共圖新治其以明年爲嘉靖元年大赦天下與民更始嗚呼君人之道在昭德以塞違繼世之規惟更化而善治特頒渙號用慰輿情弘施大賚之恩永錫太平之福四方臣庶咸使聞知正德十六年四月二十二日

上諡詔

詔曰自古人君功德施於當時咸有顯號隆名以祔於廟饗傳諸萬世我朝列聖相承率由茲典有不可易者恭惟皇兄大行皇帝以英武之資剛健之德嗣登寶祚十有七年於茲矣任賢圖政節財阜民克詰戎兵屢平僭亂淵慮弗遑於寢食皇威昭布於邇遐真有安不忘危持盈保成之志用是宇內咸乂邊陲晏然治理之興方有望於今日夫何不幸龍馭上賓天下臣民攀號莫逮顧予涼薄肇纘鴻基允惟付託之艱方深在疚之慟追慕遺烈率遵舊章謹命在廷文武羣臣參稽禮文議薦謚號博采衆論協於至公乃於今年五月初八日祇告天地宗廟社稷奉冊寶恭上大行皇帝尊謚曰承天達道英肅睿哲昭德顯功宏文思孝毅皇帝廟號武宗嗚呼盛德法乎乾剛實揄揚之莫罄徽稱薦夫般禮尙昭顯於無窮布告

萬方咸宜知悉正德十六年五月十一日

上尊號詔

詔曰自古帝王以孝治天下尊親之禮其來遠矣仰惟聖母慈壽皇太后敬相皇考孝宗皇帝訓育皇兄武宗皇帝舍弘光大蔚有顯聞皇兄奄棄臣民之日中外岌岌賴我聖母上念宗社大計擁翊冲人入繼大統及翦除兇逆潛消禍變呼吸之際安定家邦功德並隆揄揚莫既不舉尊崇之典曷伸孝敬之誠皇嫂皇后巽順含章安貞應地克儻宸極表正宮闈母儀有年名稱宜異重念聖祖母貴妃聖善慈仁靜專明哲事我憲祖贊理內庭燕謀兆祥澤隆佑啓本生父興獻王聰明天授仁孝夙成河間好禮東平樂善餘慶流衍垂裕後人本生母興獻王妃莊敬持身儉勤治內婉德任姒遠嗣徽晉誕育眇躬不承前烈雖傳序之統義有所專而天性之恩自不容已用是遠稽載籍博采公言率籲文武羣臣謹奉冊寶上聖母尊號曰昭聖慈壽皇太后皇嫂曰莊肅皇后又奉聖母懿旨上聖祖母尊號曰壽安皇太后本生父母曰興獻帝興國太后大禮旣舉洪恩誕敷嗚呼愛由親始廣孝必因乎心恩以序推爲治可運於掌詔告天下咸使聞知嘉靖元年三月十五日

立皇后詔

詔曰君理外治后理內治天下之大義也自古聖帝明王彝章具載朕繼承大統夙夜孜孜敷求賢哲共圖治理近者聖母昭聖慈壽皇太后念內治之重特諭所司簡求令淑作配朕躬朕勉尊慈命乃敢詔告

天地宗廟於嘉靖元年九月二十八日冊立陳氏爲皇后正位中宮以共承宗祀奉養四宮用衍本支萬年之慶布告中外咸使聞知嘉靖元年十月初一日

加上尊號詔

詔曰朕恭膺天命嗣承皇兄武宗毅皇帝大統祇奉宗祀惟我皇考孝宗敬皇帝神謨聖政是繼是行夙夜孜孜圖惟化理以治本於孝故雖天子必有所尊仰惟聖母昭聖慈壽皇太后擁翊之功至大莫罄名言本生父母興獻帝興國太后鞠育之恩至深罔殫報稱尊稱未極恆用慊然爰稽舊章祇告於郊廟社稷率文武羣臣恭奉冊寶加上聖母尊號曰昭聖康惠慈壽皇太后興獻帝尊號曰本生皇考恭穆獻皇帝興國太后尊號曰本生聖母章聖皇太后義專隆於正統禮兼盡夫至情既舉縟儀肆彰大慶於戲愛敬始於家邦致一人之達孝仁恩徧於海宇得萬國之歡心布告臣民俾咸知悉嘉靖三年四月十九日

定稱謂詔

詔曰人君爲治必本於孝道聖人論政必先於正名孝在篤於親而名貴循其實自古及今未有外是而能化成天下者也朕本憲宗純皇帝之孫孝宗敬皇帝之姪恭穆獻皇帝之子逮皇兄武宗毅皇帝上賓之日仰遵聖祖兄終弟及之訓屬以倫序當立遺詔命朕嗣皇帝位昭聖康惠慈壽皇太后乃以懿旨遣官迎朕入繼大統朕受明命位於臣民之上者於茲已三年矣尊稱大禮屢命廷臣集議輒引漢定陶共皇宋濮安懿王二事爲據至再至三而其論未定朕心靡定蓋伯姪父子乃天經地義豈人所能爲乎況

漢宋二帝在衣裳垂御之日。嘗爲立子而朕則宮車晏駕之後。入奉宗祧。實與人後者不同。今亦爲繼嗣。亦非我聖祖垂訓初意。是豈徒禮官之失。而亦朕沖年未能決擇之咎也。朕祇承九廟。尊養三宮。正統大義。未嘗有間。惕然此心。夙夜不忘。惟恭穆獻皇帝章。聖皇太后。朕之父母也。劬勞之恩。昊天罔極。雖位號已隆。而名稱未正。因心之孝。每用歎然。謹已告於天地宗廟社稷。稱孝宗敬皇帝。曰皇伯考昭聖皇太后曰皇伯母恭穆獻皇帝。曰皇考章聖皇太后曰聖母。各正厥名。揆之天敍人倫。情既允稱。而禮亦無悖焉。猶慮天下臣民未能知悉。特茲詔諭。以申朕拳拳孝親之誠。夫孝立則篤。近舉遠而家邦四海咸固。於至仁名正。則言順事成。而禮樂刑法。各臻於至理。朕蓋庶幾於古帝王之盛也。顧惟昔者孝未遂於尊親。事多拂於天性。君臣之際。未免少乖。舉措之間。或多違戾。今彝倫攸敍。大禮告成。朕方欲同心以和典禮之重。敬事以建臣民之極。爾內外諸司百僚。務宜體朕之意。有官守者修其職。有言責者盡其忠。凡舊章未復。弊政未除。人才未用。民生未安。邊備未飭。軍儲未充。一切有俾於政理。利於軍民者。其一一條具聞奏。朕將舉而行之。期於得萬國之歡心。致天人之佑祐。以成至治。以全大孝。則朕之志。於是乎可慰矣。布告中外。咸使聞知。嘉靖三年九月十五日。

遇災變寬恤詔

詔曰。朕惟人君奉天明命。統御萬方。作人君長。朕以菲薄之資。起自宗藩。入繼祖宗大統。夙夜孜孜。罔敢自豫。惟敬天法祖。親賢圖治。以福斯民。然必賴左右輔導文武羣臣。協心贊助。以匡不逮。夫自卽位以來。

災變頻仍而去歲之災尤大且異豈非政化未臻民心積怨上干天和朕深用驚懼寢食靡寧究其咎本實予一人所致而內外文武百官亦不無責輔導之臣不能盡誠贊襄部院之官不能協力任事居言路者言非忠讜職宣化者澤不下流弊政多端欺上虐下民心怨咨無所控訴朕深居九重四方民隱無由盡知特令部院科道各陳所當興革事宜開具上請朕與輔臣采其切實可行者行之凡爾文武官員當痛切省戒深體朕畏天恤民之意各盡乃職各修乃事爲上爲德勉效忠誠爲下爲民加意撫恤務期道洽忻悅上回天意導迎休祥陰陽調和民物康乂以成熙皞之治勿得視爲虛文欽哉戒哉於戲應天以實必上下之交修視民如傷合遠邇而一致當春陽發育之候施同仁曠蕩之恩庶幾化洽於人和用以培植乎國本詔告天下咸使聞知嘉靖六年二月十三日

郊祀禮成詔

詔曰朕尊太祖高皇帝敬天之制恭建圜丘於南郊於今十一月二十二日冬至祇行大報之禮朕惟人君上奉皇天而作之子下主億兆而作乎王以上古聖帝明王咸克上奉於天下勤於民者乃以其祇若天心勤恤黎庶洪惟朕皇祖高皇帝當夷狄亂華之時稱皇天之眷求乃挺立紀綱掃氛除垢復建人極重修五典於是奉郊廟社稷有儀文之可推有憲章之可法用昭假於神祇祖考允爲創世之首務萬代不刊之巨範也朕以藩服仰荷天命作厥辟於萬方顧其寡昧深懼弗勝茲恭率祖之攸行用欽昊穹之眷注上賴皇天垂鑒祖考蔭翊以及左右勳輔賢良矢心殫力之所贊成者也於朕則無一得焉嗚呼

大報既成，庶遂微忱之懇恩澤適布，以敷洪造之仁。尙賴忠賢匡朕一人之不逮，期臻至治。用光列祖之休嘉，詔告天下，俾悉聞知。嘉靖九年十一月二十三日。

元子誕生詔

詔曰：朕聞承祧主器，必在元良。繼位嗣服，惟宜傳長。故曰君之儲貳，是謂今昔咸同。朕以支人仰承皇天洪眷，纘嗣皇祖丕圖，卽位於今，已訖一紀。大婚去後，又越十年。每思傳繼之久虛，若履薄冰而戰懼。上廑聖母，竚望之深，下遺臣民，引領之至。朕心震惕，朝夕匪寧。昨歲元輔建策，慎選淑女，以備妃嬪之御。用廣嗣緒，之求朕請於慈命，聞於祖考，卜吉納九氏。以用資繁衍之祥，助烝嘗之職者，乃於今年八月十九日，皇天降祉，祖宗鑒蔭。朕第一子生屬麗嬪閻氏出，是皆皇考聖母鍾祥積慶，而衍及孫謀者也。茲用播聞中外，誕布寬恤。於戲，主鬯得人，允副慈懷之怡慰。承家有繼，實昭佑我之通情。爰法舊章，用覃大賚。詔告天下，咸使知悉。嘉靖十二年八月二十五日。

立后詔

詔曰：朕惟大婚爲王教之始，克謹於初，閨門爲政化之原。其終尤慎，是以易著家人之訓，詩昭窈窕之稱。二女妻於舜，乃致風動四方之休。一德配於周，而爲關雎二南之美。凡有天下者，豈不想慕之？未若其時也。朕以宗人仰承明命，纘嗣丕圖，方當紀元之初，已舉好逑之典，始配以疾而崩，繼立作孽而廢，矧歲時相我宗祀，不可無人。而左右承養慈顏，豈宜少后？弗正厥名而定位，焉能贊治以承乾？乃卜今年正月望

之令辰祇聞於皇天后地請命於列祖皇考白於聖母遺文武重臣持節奉制冊立德嬪方氏爲皇后贊朕內治統職陰柔率教六宮母儀四國於戲天施地生大本藉茲而是建乾剛坤順洪基由此以隆興爰斯申立之禮成用播三辭而徧諭敷悉臣民咸宜知之嘉靖十三年正月十八日

元嗣繼生詔

詔曰朕惟稱孝以有後爲大著在聖經人生而望嗣則同王者特重欲宗祀之繇須繼承之續續比歲朕荷天錫元祥未久而已由斯聖母重其懷臣民重其望朕每慮此若臨深淵而用懼惶茲者是歲孟冬之六日仰戴皇天降鑒幸惟皇祖慶源朕繼生元嗣乃昭嬪王氏出焉爰循往例申布恩宜令至所司主者卽行於戲震鬯毓祥上永宗祧之祀離明增耀下敷臣庶之歡詔告天下俾悉聞知嘉靖十五年十一月初六日

禱祿禮成詔

詔曰朕惟王者之政莫不以祀典爲先故謂國之大事在祀與戎而祀尤重焉夫郊所以事天廟所以事先其道一而已矣未有不相關者也朕以沖愚宗末仰叨上帝下簡俾嗣天位君臨四方思典禮之重大者祀爲首焉每念於茲切興長慨柰何經傳所傳亦多雜亂聖賢不爲接緒聖經殘破莫修是以郊祀襲合祭於屋下之文廟祭沿異室同堂之制變瀆之甚謂比同牢功德不別太祖莫尊朕乃不暇他顧祇聞於皇天默卜於皇祖親簡忠賢與之同力首建圜丘方澤以事天地明陰陽之位而不可混襲續創昭穆

羣廟以祀祖宗彰太祖爲當專尊之主復作太宗廟於羣廟之外表祖功宗德之不遷以享百世之祀更
皇考廟曰獻皇帝廟別擇吉區以避渠道大工悉遂定五歲大舉福祭之禮於太廟以祀皇初祖而奉太
祖配焉每特享祖宗以立春於本廟夏秋冬皆合享於太廟循時祫之典季冬仍修大祫禮於太廟皇考
止修四時之祀以避豐祫之嫌奉安既成將覃恤典由是先致孝於慈闈庶伸誠於璇闕恭上兩宮徽號
曰昭聖恭安康惠慈壽皇太后章聖慈仁康靜貞壽皇太后慶禮既備推愛宜頒主者遵承於戲郊社正
而廟制正庶慊朕事天事祖之心慈壽尊與慈仁尊允合夫人情禮情之至爰推恩恤肆及宗親尙期臣
工之協恭俾爾弱君於至治弘播詔示悉使聞之嘉靖十五年閏十二月十二日

上成祖睿宗廟號詔

詔曰朕惟天眷我國家皇祖太祖高皇帝始肇於先皇祖太宗文皇帝戢成於後二帝之玄功盛烈高厚
同焉朕以支宗荷天下簡用纘寶位於茲已一十七載矣追繹我文皇帝之功光太祖澤蔭後昆繼惟我
皇考獻皇帝躬備聖德慶延於朕輝前庇後載籍弗聞文皇帝也宜有功而祖報焉獻皇帝也可有德而
宗稱焉庶幾伸孫子崇顯尊親之至意適因法古典明堂之舉乃稽循嚴考配帝之經議命在廷百官會
訂至於再三師錫之我僉謂之同朕以九月九日躬祇奉於圜丘敢以大禮請命分命諸使徧奉朕誠各
請方澤宗廟社稷以告越二日率羣臣奉寶冊崇尊皇祖文皇帝廟號尊謚爲成祖啓天弘道高明肇運
聖武神功純仁至孝文皇帝尊上皇考獻皇帝廟號尊謚爲睿宗知天守道洪德淵仁寬穆純聖恭儉敬

文獻皇帝卽日恭行皇考祔享於太廟仍藏主於原寢是月之二十一日太廟躬行季秋堂禮於大內立極寶殿祔享於上帝奉我皇考睿宗獻皇帝配神於戲肇太享於初成馨物與民胞之意奉嚴親而上配答生成罔極之恩禋典忻成慶同民物凡在堪輿之內聞詔宜悉欽哉嘉靖十七年九月二十一日

崇薦大號詔

詔曰朕聞洪荒草昧三才未立追厥開天闢地於惟上帝宰御焉載稽往元醜亂我夏於惟皇祖高皇帝出焉次建寶圖以成高皇之烈者我太宗皇帝也申啓明運以光前勳之盛者我皇考功德也於是慶鍾澤積至於今日朕方當童昧之年不受仔肩之重眇末弗肖祇叨荷於天眷洪深愚暗不才欽感沐於帝恩隆大位處王公士兆之上君臨四國萬姓之尊圖報稱於上帝皇祖太宗皇考之心終日思維十復七歲矧人君稱皇取莫大之名於天又復自謂曰天子而推崇如事父之情何未之思且蒼旻昊上未盡高覆廣編之極是以朕特竭愚念已於此月一日上辰祔具冊表親率臣民趨詣圜丘拜上皇天上帝大號卽復恭思萬類億物皆本乎天朕爲民物報事天之心旣少少盡矣惟人之本則非祖何用是因追本之誠亦實昭我皇祖丕烈古前所無者故就一辰奉冊寶偕皇后率臣妾躬詣太廟崇薦皇祖聖號曰太祖開天行道肇紀立極大聖至神仁文義武俊德成功高皇帝高皇后肇修陰教允輔天德加薦慈謚曰孝慈貞化哲順人徽成天育聖至德高皇后復惟太宗皇帝克成太祖洪業功備創守前於九月十一日加尊爲成祖啓天弘道高明肇運聖武神功純仁至孝文皇帝初以秋季大享之典所關爲民謝福王者大

事式循經義之正特舉宗祀之章況我皇考玄德升聞輝前啓後宜薦宗稱卽此之十一日恭上尊號爲睿宗知天守道弘德淵仁寬穆純聖恭儉敬文獻皇帝是月二十一日祇大享上帝禮於宮右乾隅之玄極寶殿奉皇考配帝茲者六氣始復之辰九舉大報之典珪璧是奉仰上帝已垂歆祝帛是將荷皇天之錫鑒朕衷懼戴莫罄名言臣庶同情敢稽天貺特覃大賚之恩敬布好生之德於戲事天事帝而事祖考郊大報與堂大享以同伸報功德而報生成皇矣天皇矣祖考斯並盡慶豔神人忭極民物澤流帝惠有血氣者其思之以尊親言露朕情凡見聞者宜念哉而祇澤布於華夏播彼夷虜欽哉嘉靖十七年十一月十一日

冊立皇太子詔

詔曰朕惟人君奉天命而君臨天下所重者大本係焉是以自神禹至今率遵此道用一人心也比歲朕荷皇天俯眷元嗣誕生數歲之間疊承洪造顧朕何人鉅膺帝德深惟皇祖垂裕之恩列聖累積之大皇考功德玄隆皇妣善慈廣萃慶集朕躬顯受丕荷至有今日茲念祖宗家法具在慈屬切朕赤中冀文武羣臣屢請左右元僚力贊咸以國本之定此其時也朕亦思惟欲圖久大之治安須早定立於儲貳兼以蕃輔之重故同建本而行適取昨日元吉是維今月一日朕躬祇請命於皇天皇祖分命諸臣告於方澤列聖大社稷帝社稷神祇大頒冊寶立朕元子載樞爲皇太子分封第二子載至爲裕王第三子載圳爲景王慶典旣成恩澤斯覃舉昭代之彝章答敷天之至望於戲宜王宜君衍本支於百世錫福錫祿溥仁

元於萬方允協神人之大猷益篤邦家之永祐徧播華夷俾悉知悅嘉靖十八年二月初四日

駕幸承天詔

詔曰朕聞聖人之治天下也率皆以孝爲先蓋所以教民作範焉弗孝何以上人乎朕以菲才叨承天眷君茲黔首主御華夷所事者人極重焉故首正父子天倫之正復宗考廟當有之宗適者積衍深深累於慈聖鸞輿遐邁哀徒摧五內之傷鳳寢再圖禮厥宜二親之共匪自經營何慰夙夜乃於今年仲春之十有一日奏告於天地宗廟社稷徧達於百靈衆秩於十有六日駕徂荆楚之舊藩躬視承天之嚴寢越二十有五日駐蹕龍飛內之卿雲宮齋潔肅誠定禮備樂有五日元吉祇奏告之祀於皇天奉皇考獻宗獻皇帝上配報生恩而拜謁顯陵答神功而躬祭社稷以及道經之望徧兼舉諸王羣職迎覲獻誠雖未如四狩之巡亦以見省方之意且朕何人敢堯舜似祇欲伸送終之道以求夫永世之安庶幾教天下也今玄寢之制置旣詳親體之尊安攸定但念本根所在百姓繫懷勞擾久時民艱當軫承天府自明年爲始特免田租三歲湖廣地方與免明年田租五分之二北直隸河南二處亦與免明年田租三分之一用見朕懷恤之意期以今月二十三日還京於戲慎終思永立愛敬以式臣民經始求臧建中業以遺孫子尙賴忠賢匡於至治詔爾華夏宜悉知之嘉靖十八年三月二十日

太廟災詔

詔曰朕惟邃古之世道隆化洽人淳氣和其爲君者曰堯曰舜而爲臣者乃禹乃益不可及矣降是禹湯

文武繼作而有稷契周召以佐之亦不可尙矣下而曰漢唐宋其間誼辟英君之時見終未若上古之休或多災害絕未有如今日之變者也朕皇祖高皇帝應天順人復夏掃穢功德之盛無前大烈朕以藩嗣當皇兄昇遐之日命朕入繼大統朕嗣天位十有七歲之間思報祖德先正太祖南面之尊備建七廟之制加薦尊謚用聲追崇賴二三大臣協恭力贊然非朕變更成典實本信任古道他悉罔忌自謂報答本源之情少盡詎意有今日之變云也今年四月五日夕初正以恆陽之雨爲懼當時仁廟倏忽火起驟然暴作加以猛風四發人無措手相視號顙莫容救護卽刻仁廟成祖廟主同燬延爇太廟及昭穆羣廟祇存睿宗廟安全朕自昨冬孟月患疾至今元氣未復精神失飲食減昔氣血兩虧一聞奏報若墜深淵欲赴火中思無濟事且因病未全復益加瘡痏力疾奉慰祖宗於景神殿祇載罪奏謝於上帝皇祇告於太社遣官偏祭百神書報宗室諸王詔示天下臣庶庶使知一人之重罪致上延七廟之御棲按厥咎原無可容已爰將寬恤之文預示圖復之力於戲仁敬孝以爲德必自今而加勉責在台躬寅恭忠而弼亮須伊始以交修望爾有位要究夫邦興於多難之機勿便謂后弗類先王之行雖時君罔肖申宣當念我邁德湯武共圖夾持之道用盡回天之誠敷告中外都使聞知嘉靖二十年四月

奉安神主詔

詔曰朕惟宗廟之禮所以序昭穆孝子之至莫大乎尊親古之訓也我國家宗廟之制自太祖肇基首立四親廟其後更制同堂異室此固稽古之制用協七廟之文是以創建式師周典迺以鬱攸不戒原之昭

穆不明用是復同堂之建實有不得已之情爰情更制崇構新宮時祫祭享奉太祖正位居尊成祖及列聖與我皇考睿宗皇兄武宗俱同堂而序享獻之節悉用往儀大功既就茲以七月初一日吉辰敬告成事奉安列聖神主聖靈希妥朕志莫伸維昔典禮之成宜廣推仁之惠於戲闕宮有恤鴻規既復於巍崇寢成孔安殷薦克伸於妥侑固未副沖人之永思特蚤慰一時之孝念也詔告天下尙有聞知嘉靖二十四年七月日

世宗遺詔

詔曰朕以宗人入繼大統獲奉宗廟四十五年深惟享國久長累朝未有乃茲弗起夫復何憾但念朕遠奉列聖之家法近承皇考之身教一念惓惓本惟敬天勤民是務祇緣多病過求長生遂致姦人乘機誑惑禱祠日舉土木歲興郊廟之祀不親朝講之儀久廢旣達成憲亦負初心邇者天啓朕衷方圖改轍而違嬰疚疾補過無由每一追思惟增愧恨蓋愆成美端仗後賢皇子裕王仁孝天植睿知夙成宜上遵祖訓下順羣情卽皇帝位勉修令德勿過毀傷喪禮依舊制以日易月二十七日釋服祭用素饁毋禁民間音樂嫁娶宗室親郡王藩屏爲重不可輒離封域各處總督鎮巡三司官地方攸繫不許擅去職守聞喪之日各止於本處朝夕哭臨三日進香差官代行衛所府州縣并土官並免進香郊社等禮及朕祫葬祫享各稽祖宗舊典斟酌改正自卽位至今建言得罪諸臣存者召用歿者卹錄見監者卽先釋放復職方士人等查照情罪各正刑章齋醮工作採買等項不經勞民之事悉皆停止於戲子以繼志述事兼善爲

孝臣以將順匡救兩盡爲忠尙體至懷用欽惟命詔告中外咸使聞知嘉靖四十五年十一月十四日

明書卷五十五

志五

綸換志五

穆宗莊皇帝

登極詔

詔曰惟我祖宗聖聖相承至治鴻功超越千古暨皇考大行皇帝以經文緯武之德建安內攘外之勳增光先朝垂庇後世方幸永賴遽爾上賓特廩憑几之言屬以神器之重朕煥煥在疚本不忍聞而文武羣臣下及耆老軍民合詞勸進至於再三不得已乃遵遺詔於是月二十六日祇告天地宗廟社稷卽皇帝位以明年爲隆慶元年仰惟末命之昭垂深望繼述之兼善俛焉自省豈所能勝然而先志不可不成聖訓不敢不奉是用推類以盡義通變以宜時期衍舊恩邇宏新化於戲觀耿光而揚大烈方勉盡於孝思贊帝軌而翊皇猷實有資於忠盡凡爾有位尙體朕心各據匡輔之誠共保熙昌之祚播告中外咸使聞知嘉靖四十五年十二月二十六日

世宗尊謚詔

詔曰朕惟自古聖王其生也天下之人相與尊而親之其歿也相與頌而思之若禹湯文武是也洪惟我皇考大行皇帝以上聖之德撫中興之運湛恩所被莫不歸仁明威所加罔不震懾蓋在臨御之日爲天下所尊親久矣逮乎宸衷厭世龍馭遐升朕銜哀茹荼不勝瘠毀而凡臣庶亦莫不摧心泣血有喪考之感焉茲朕敕諭文武羣臣稽古禮文議薦謚號博參輿論允協至公乃以正月十九日祇告天地宗廟社稷奉冊寶恭上皇考大行皇帝尊謚曰欽天履道英毅聖神宣文廣武洪仁大孝肅皇帝廟號世宗諒爾萬方其頤而思焉之心均無窮也屬殷禮之旣舉爰湊號之用頤夫仰皇考之徽稱則必信從其治教感皇考之餘澤則必翊戴於邦家尙一乃心用若予化播告遐邇咸使聞知隆慶元年正月二十日

孝恪皇后尊謚詔

詔曰朕惟禮不可以忘本而孝莫大乎尊親是以自古聖帝明王暨我祖宗列聖續祚膺圖君主天下莫不致隆於所生蓋天理人情之至也成憲具存在朕爲尤切洪惟皇妣榮淑康妃生稟巽明躬備坤則事我祖妣旣克嗣於徽音奉我先皇寔贊成夫陰教和惠洽乎九御恭儉聞於四方委祉發祥誕育冲眇不惟保愛之曲至抑且訓迪之周詳茲朕獲奉宗祧紹列聖之洪休續先皇之大業固皆慈誨之貽也顧音容已隔歎霜露之屢經尊養欲伸悲風木之不待永言感慕倍結深衷乃考舊章並詢輿論特舉追崇之典遜隆儼極之積於正月二十一日祇告天地宗廟社稷恭上尊謚曰孝恪淵純慈懿恭順贊天開聖皇太后嗚呼至恩罔報鴻儀少展於孝思大德難名顯號但從於節惠庶廣普天之譽用之永世之辭播

告中外俾咸知悉隆慶元年正月二十二日

立后詔

詔曰朕聞古者天子聽外治后聽內職是以外內和順國家理治稱盛德焉朕茲誕膺天命君臨萬方深惟王化之成宜資女士之助妃陳氏受命先皇配朕潛邸徵音克嗣坤道夙章是用祇告天地宗廟社稷以隆慶元年二月初九日冊立爲皇后正位中宮共承宗祀庶宏四海之化益開萬福之原播告中外咸宜知悉隆慶元年二月十三日

立皇太子詔

詔曰朕惟自古帝王奉天子民思宏永世之圖莫不崇建元良豫定儲貳所以隆國本而繫人心也我祖宗列聖造基續緒累治重熙率由茲道朕荷天之眷早錫胤祚長子英姿岐嶷睿質溫文仁孝之德夙成中外之情允屬昨朕嗣登太寶文武羣臣卽以建儲爲請朕以子年方在沖幼未之許也茲者禮官復稽先朝彝典疏懇至於再三詢謀僉同理難終拒爰諭吉日祇告於天地宗廟社稷授冊寶立爲皇太子上以奉九廟神靈之統下以慰兆人翊戴之心盛禮既成普天同豫肆頒渥澤覃被多方於戲震男主器益培萬載之丕基巽命敷恩用衍一人之大慶詔告華裔咸使聞知隆慶二年三月十一日

遺詔

詔曰朕以涼德纘奉丕圖君主萬方於茲六載實夙夜兢兢圖惟化理惟恐有辜先帝付託乃今遘疾彌

篤殆不能興夫生之有死如晝之有夜自古聖賢其孰能免惟是繼體得人神器有主朕卽棄世亦復何憾皇太子聰明仁孝令德天成宜嗣皇帝位其恪守祖宗成憲講學親賢節用愛人以緜宗社無疆之祚內外文武羣臣協心輔佐共保靈長斯朕志畢矣其喪禮悉遵先帝遺制以日易月二十七日釋服毋禁音樂嫁娶宗室親王藩屏是寄不可輒離本國各處鎮守總兵巡撫等官及都布按三司官員嚴固封疆安撫軍民不可擅離職守聞喪之日止於本處朝夕哭臨三日進香遣官代行廣東廣西四川雲南貴州及各處布政司七品以下衙門俱免進香詔諭中外咸使聞知隆慶六年五月二十六日

神宗顯皇帝

登極詔

詔曰我國家光啓鴻圖傳緒萬世祖宗列聖創守一心二百餘年重熙累洽我皇考大成皇帝明哲作則恭儉守文虛己任賢勵精圖治蓋臨御六載而天下晏如四裔來賓兆人蒙福方燕詒之永賴遽龍馭之上賓顧命眇躬屬以神器朕方煢煢在疚不忍遽聞而文武羣臣及軍民耆老人等合詞勸進至於再三辭拒弗獲乃仰遵遺詔俯順輿情於六月初十日祇告天地宗廟社稷卽皇帝位朕以涼德方在沖年惟上帝之眷命孔殷祖宗之基業至重兢兢夙夜懼不克堪尙賴文武親賢共圖化理爰暨萬方黎庶與有嘉休其以明年爲萬曆元年與民更始於戲纘大承休惟奉累朝之成憲布德施惠用洽萬國之歡心將升大猷在謹初服詔告天下咸使聞知隆慶六年六月初十日

穆宗尊謚詔

詔曰朕聞帝王有駿德豐功昭著於當時則必有鴻名顯號垂示於萬世斯古今之通義國家之令典也惟我皇考大行皇帝聰明睿智恭儉寬仁懋聖學於輯熙攬乾綱於獨斷靈承帝命軫恤民艱先德政而後刑威崇文教而修武備外夷賓服中國乂安享六載之昇平垂萬世之基緒增光列聖超越百王功德之隆蔑以尚已不幸龍馭上升攀號莫逮朕以涼德嗣守丕基方續述之是圖豈光揚之敢後謹命文武羣臣參稽古禮議薦崇稱博采師言協於公論乃於今年七月初三日祇告天地宗廟社稷奉冊寶恭上大行皇帝尊謚曰契天隆道淵懿寬仁顯文光武純德宏孝莊皇帝廟號穆宗於戲乾坤高厚固蕩乎其難名日月昭垂蓋渙焉而可仰布告中外咸使聞知隆慶六年七月初四日

敕諭文武羣臣

蓋聞理道之要在正人心勸阻之機先示所向朕以冲幼獲嗣丕基夙夜兢兢若臨淵谷所賴文武賢臣同心畢力弼予寡昧共底昇平乃自近歲以來士習澆漓官方冗缺鑽闕隙竇巧爲獵取之媒鼓煽朋儔公事擠排之術詆老成廉退爲無用謂讒佞便捷爲有才愛惡橫生恩讐交錯遂使朝廷威福之柄徒爲人臣酬報之資四維幾至於不張九德何由而咸事朕初承大統深燭弊源亟欲大事芟除用以廓清氛濁但念臨御茲始解澤方覃鋸鋤或及於芝蘭密網恐驚乎鸞鳳是用去其太甚薄示戒懲餘皆曲賜矜原與之更始書不云乎無偏無黨王道蕩蕩無黨無偏王道平平朕方嘉與臣民會歸皇極之路爾諸臣

亦宜痛湔宿垢共襄王道之成。自今以後其尙精白乃心恪恭乃職毋懷私以罔上。毋持祿以養交。毋依阿淟涊以隨時。毋噂嘻翕訾以亂政。任輔弼者當協恭和衷。毋昵比於淫朋。以塞公正之路。典銓衡者當虛心鑑物。毋任情於好惡。以開邪枉之門。有官守者或內或外。各宜分猷念以濟艱難。有言責者公是公非。各宜奮讐直以資聽納。大臣當崇養德望。有正色立朝之風。小臣當砥礪廉隅。有退食自公之節。庶乎朝清政肅。道泰時康。用臻師師濟濟之休。歸於蕩蕩平平之域。爾等亦皆垂功名於竹帛。祿廕於子孫。顧不美歟。若或沈溺故常。堅守塗轍。以朝廷爲必可背。以法紀爲必可干。則我祖宗憲典甚嚴。朕不敢赦。百爾有位。宜悉朕懷。欽哉故諭。隆慶六年七月十六日。

兩宮徽號詔

詔曰。朕以寡昧。祇奉宗祧。永惟盡倫盡制之君。皆有尊親養親之典。蓋禮緣分定。而孝因心推。彝憲具存。朕曷敢後。恭惟我聖母皇后體備坤儀。翼宣化理。敷遺後嗣。啓佑宏多。我聖母皇貴妃穆修壺教。克嗣徽音。誕育眇躬。恩勤備至。肆予小子。獲嗣丕基。惟皇考之光命是承。亦惟聖母之訓育是賴。崇功報德。實切朕懷。宜各極於尊稱。以永綏乎至養。是用博諮羣議。祇率舊章。以本年七月二十七日謹奉冊寶上聖母皇后尊號曰仁聖皇太后。聖母皇貴妃尊號曰慈聖皇太后。大禮肇舉。洪恩覃敷。於戲福隆。名壽鴻庥。祇迓於三靈。愛始家邦。孝治永光於四海。播告中外。咸使聞知。隆慶六年七月二十八日。

冊立中宮詔

詔曰。朕惟兩儀之位。承乾以坤。萬化之原。由家而國。君聽外治。后宣內教。此天地之大義也。朕恭膺天命。嗣守祖基。夙夜兢兢。欲保茲麻服傳之世世。瞻惟大婚之禮。所以昌祚基化。人道重焉。邇者聖母仁聖皇太后。聖母慈聖皇太后。特諭所司。簡求令淑。作配朕躬。朕仰遵慈命。謹昭告天地宗廟於萬曆六年二月十九日。冊立王氏爲皇后。正位中宮。以共承宗祀。奉養兩宮。肇風化於九圍。緜本支於萬世。布告中外。咸使聞知。萬曆六年二月二十一日。

兩宮徽號詔

詔曰。朕惟帝王之孝。莫大尊親。稽我祖宗列聖。致隆所尊。顯號鴻名。有加無已。孝思維則。具有彝章。朕嗣統之初。屬在幼沖。罔知攸濟。惟我聖母仁聖皇太后。聖母慈聖皇太后。擁佑誨迪。備極劬勞。七載於茲。萬邦作乂。豈予寡昧。能勝負荷。實賴我聖母洪仁懿訓。所致也。遡惟恩德。莫罄報酬。茲當加禮之成。益篤慈闡之慶。謹稽舊典。申薦徽稱。祇告於郊廟社稷。率文武羣臣。奉冊寶加上聖母仁聖皇太后尊號曰仁壽懿安皇太后。聖母慈聖皇太后尊號曰慈聖宣文皇太后。顯揭鴻名於宇宙。於昭至德之光華。爰需明恩。用覃廣愛。於戲。禮協義而稱隆。式備尊親之典。孝因心而廣愛。洪敷錫類之仁。播告寰區。咸宜知悉。萬曆六年三月初八日。

皇子誕生詔

詔曰朕聞自古帝王紹聖祈天必隆胤祚蓋以祇承宗社茂衍本支邦家之慶莫大於此朕以眇躬嗣登大寶於茲十年幸方內乂安四夷賓服庶不墜祖宗丕構惟大婚有年熊祥未協中外人心舉深溪望朕用是不釋於懷茲荷皇天錫佑列聖垂庥以今年八月十一日第一子生係恭妃王氏出上副兩宮聖母憂勤之念下慰四海臣民仰戴之情粵稽舊章用覃大賚於戲震符誕啓緜統緒於萬年解澤旁流霈仁恩於九有詔告天下咸使聞知萬曆十年九月初六日

兩宮徽號詔

詔曰朕聞家國之祥無逾於昌後帝王之孝莫大於尊親累朝以來著於彝憲朕以寡昧纂承祖宗之遺業懼弗克堪惟我聖母仁聖懿安皇太后慈聖宣文皇太后擁翼教誨式臻治理乃瞻懷宗祧之重於嗣續大計尤惓惓焉茲者恭荷天庥誕生元嗣發祥鍾慶實惟慈澤之所貽永念深恩宜登顯號爰祇告郊廟社稷率文武羣臣奉冊寶加上聖母仁聖懿安皇太后尊號曰仁聖懿安康靜皇太后聖母慈聖宣文皇太后尊號曰慈聖宣文明肅皇太后用闡揚盛美仰答洪慈載考舊章庸敷慶典於戲敦孝治於九重申舉恭隆之典需德音於萬國宏施不匱之仁播告寰區咸宜知悉萬曆十年九月十一日

寧夏平定詔

詔曰朕繼承丕緒君主華夷內安外寧茲二十載蚤夜兢兢惟敬天勤民是念端居靜攝毋敢怠荒祇圖邊境乂安興民休息何期變亂之事忽起朔方之間逆賊哱拜哱承恩父子者本以夷種冒竊冠裳包藏

禍心素恃強很乃構叛卒劉東陽許朝士文秀等借言撫馭乖方糧餉虧剋乘機煽禍羣造反謀戕殺命官據城負固妄意祿山之故事敢萌元昊之邪心辯髮從夷僭稱王號傳播僞檄擅毀敕書奪庫放囚搜金括帛燒毀衙舍逼脅親藩句虜爲援毒民肆虐欲奪靈州以成掎角謀窺關陝而犯中原九塞因是驛騷三秦爲之震動誠神人共憤而罪惡滔天者也幸賴皇穹厭禍宗社垂庥大小臣工效謀於內文武將吏宣力於外兵摧強虜水灌堅城犬羊膽寒豺狼氣奪旣熊羆之畢集乃晝夜而兼攻釜底遊魚尙思奪蠻檻中逸獸無計逃生衆士咸賈勇以先登羣兇遂就擒而授首三旬逆命未馴干羽之來六月興師竟奏獵狁之捷遙傳露布驩動雷聲解一方之倒懸開三尺之密網論功行賞弔死扶傷僭竊掃平地方寧靜除劉東陽等臨陣先誅闔門受戮今檻致嘆承恩等獻俘千里傳首九邊近足以洩忠義不平之心遠足以垂叛亂無將之戒逆天者孰能逃於憲典犯法者果何益於身家生靈不幸以致於斯天地至仁豈樂有此茲特宣示薄海内外九邊四夷軍民人等安分者爲良民保身者爲長道恪遵王法共享太平嗚呼除殘去暴赫彰天討之公鑒往懲來聳聽皇綸之播布告天下咸使聞知萬曆二十年十二月初八日

乾清坤寧宮災赦

朕恭承天命嗣續丕基二紀於茲不敢荒豫乃今三月初九日夜乾清坤寧宮災天降異殃明昭嚴譴熾燼累朝之繙構震驚聖母之起居罪由眇躬何所逃責夙夜惶惕省思愆尤蓋緣朕自靜攝以來郊廟弗躬朝講希御批答停閣聽受闕疏以致賞罰乖違臣鄰玩愒大僚不以準繩檢下而曲徇人情諸司不以

勤恪涖官而但圖私便巧文繁誚銷鑠之口何多畏事避難肩荷之大實渺爵賞日頒而誰爲激勸民力日竭而莫之省憂慎刑有令而出入或失其平懲貪雖嚴而饋遺尙仍乎舊供億繁滋而邑里稱擾戰守未息而師徒告勞凡爾等之曠官亦朕躬之失德干和召變職此之由振紀肅綱宜自今始茲用敕爾文武羣臣其各大渝積習痛加修省有官守者勿任情優游而廢壞庶事有言責者勿徇私雷同以長姦亂政事關朕躬當與天下更始責在爾等其尙交修倣予諸凡釁萌悉加補塞更勿矯厲虛名飾增詭行但長浮僞益滋煩苛如乖理道之經致拂天人之意憲章具在朕弗敢私巽命重頒咸宜恪守仍申飭在外郡國邊鎮軍民有司一體遵行庶幾仰對上天仁愛之心永迓宗社和平之福故諭

火災詔

詔曰朕以眇躬祗膺天命嗣守祖宗鴻緒二十有四載於茲夙夜兢兢罔敢懈懶迨乎邇歲靜攝深居蓋周慎於保身匪宴安而厭事百司庶務覽斷未嘗不親吏蠹民艱諒諭惟恐不徧顧焦勞徒切於上而政令未協於中致干天和流形災變昨於三月初九日戌刻乾清坤寧二宮悉被火災戴天心之仁愛甚著荷列祖之庇佑尤深幸朕所居不至延蔓而法宮嚴寢一時盡灰永懷謹告之殷實繇涼德所致拊躬自責震慄弗寧已痛加悔懲籲禱郊廟嘉與海內勉於維新茲下罪己之言共圖交倣之實夫萬方之有疾苦如在朕躬一人之省咎愆宜令衆喻尙恪恭以承天戒咸濯祓以分主憂大法小廉益謹奉公之節內寧外謐期臻至治之麻布告臣民咸使知悉萬曆二十四年三月二十五日

殿災赦

朕以涼德嗣守丕基夙夜兢兢克謹天戒昨歲乾清坤寧宮災驚悸未定乃今年六月十九日皇極等三殿復災夫三殿乃朕奉天紹祖臨御萬方之地視寢宮尤重纔踰歲所疊見咎徵變不虛生誰貽之戚蓋緣朕之不德闇於大中第防乾柄之下移不念亢陽之有悔諧臣頌爲明君則不覺其入深憲士激以危亡則更滋其不信上下之交否隔愆尤之積日多罹此大災罪其焉諉顧爾中外百職善能導朕者誰以模稜爲長厚旣無望其擔當以訕訐爲風標亦奚資於補救言清行濁至誠感發之謂何陽是陰非盡力維持之安在事多請託官麿執持安攘無策而動輒譎張行業不修而競爲浮詭貪黷雖禁苞苴之入自如侈靡相高素絲之風絕少似此難窮之陋習已屢往歲之戒書曾莫省憂重干災變自懲自艾朕旣知非分念分猷汝寧不愧茲用敕爾文武羣臣其各痛滌前愆勉圖後效大臣務正己率屬無以禮法假人小臣務精白守官無以驕蕩凌德共建持危扶顛之策各據奉公憂國之忱忠邪自照於朕衷賞罰常懸於朕握國豈負爾爾無負予巽命載頒咸宜遵守仍飭在外郡國邊鎮軍民有司一體遵行庶承皇天仁愛之心用延國家靈長之祚欽哉故諭萬曆二十五年七月初五日

三殿使災赦詔

詔曰朕仰荷天庥恭膺寶庥二十有五載於茲追惟嗣服之初蓋亦無時豫怠第緣歲積頗恃政成兼以多病侵尋猶須深居靜攝郊廟闕躬承之禮朝講希臨御之時喜怒有失其平用舍未歸於當章奏每滯

官曹半虛忠言寡聞民隱莫達方隅多故兵食之征調日繁營造又興開採之徵求四出加之旱乾水溢析民室家汙吏貪官朘民膏血叢此人怨屢干天和乃於萬曆二十五年六月十九日皇極等殿皇極等門文昭武成二閣內外周廻廊房一時被火夫寢宮煨燼曾幾何時正殿崇嚴又復罹此震驚列聖憂感慈闈躡地跼天靡所容措況一人統御之地乃萬國衣冠所歸天意若斯朕實不德茲已虔申籲禱痛加艾懲祓志改圖瞻從今始嚴敕庶位各獻忠猷惟天視聽在民惟民歸依在德爰稽典制特布詔條庶藉有衆之歡以回皇穹之眷消咎徵於已往迓福祉於將來於戲我國家忠厚比於行葦舊德宏深予一人儆戒切於苞桑新恩溥被式慰渴懸之民望仰承仁愛之天心敷告四方咸宜知悉萬曆二十五年七月初八日

平倭詔

詔曰朕纘承洪緒統理兆人海澨山陬皆吾赤子苟非元惡普欲包荒屬者東夷小醜平秀吉猥以下隸敢發難端竊據裔封役屬諸島遂興薦食之志窺我內附之邦伊岐對馬之間鯨鯢肆起樂浪玄菟之境鋒鏑交加君臣逋亡人民離散馳章告急請兵往援朕念朝鮮世稱恭順適遭困阨豈宜坐觀若使弱者不扶誰其懷德強者逃罰誰其畏威況東方乃肩臂之藩則此賊亦門庭之寇遏徂定亂在予一人於是少命偏師第加薄伐平壤一戰已褫驕魂而賊負固多端陽順陰逆本求伺影故作乞憐冊使未還兇威復煽朕洞知狡狀獨斷於心乃發郡國羽林之材無吝金錢勇爵之賞必盡卉服用澄海波仰賴天地鴻

麻宗社陰隲神降之罰賊殲其魁而王師水陸並驅正奇互用爰分四路并協一心焚其芻糧薄其巢穴外援悉斷內計無之於是同惡就殲羣酋宵遁舳艤付於烈火海水沸騰戈甲積如高山氣祲淨掃雖百年僑居之寇舉一旦蕩滌靡遺鴻鴈來歸箕子之提封如故熊熊振旅漢家之威德播聞除所獲首功封爲京觀乃檻致平秀政等六十一年棄尸藁街傳首天下永垂兇逆之鑒戒大洩神人之憤心於戲我國家仁恩浩蕩恭順者無困不援義武奮揚跳梁者雖強必戮茲用布告天下昭示四夷明予非不得已之心識予不敢赦之意毋越厥志而干顯罰各守分義以享太平凡我文武內外大小臣工尚宜潔己愛民奉公體國以消萌釁以導禎祥更念彫力殫財爲日已久嘉興休息正惟此時諸因事征加派錢糧一切盡令所司除豁務爲存撫勿事煩苛咨爾多方宜悉朕意萬曆二十七年閏四月初八日

平播詔

詔曰朕嗣承歷服式奉先猷欲人並生庶幾不擾八年以來俄煩兵甲賴天地廟社之靈將相臣民之力內攘外卻無損國威然彼皆文告不好自投釁鑊朕甚憫之非爲快也惟此播州故有楊氏爲夷長率受我冠裳子孫之仍藉有年朝廷之覆露良厚夫何其末胄應龍者安忍無親大逆不道當其嬖寵戕嫡淫刑禍民毒痛一方凶殘七姓國人皆曰可殺朕心不忍加誅因其漢官疆以戎索曲從贖死爲德帝宏而乃下愚不移肆行無忌敢爲嫚辱妄意薦窺旣逋重慶之囚遂決跳梁之志收藏亡命構煽苗夷震駭兩川恫疑四海朕猶時覃在宥未卽移師而賊因撫成驕因驕成亂內則僭越王章無復人臣之禮外則矜

詒物力有輕中國之心掩不備於綦江梗道塗於湖貴爲臣若此孰其堪之夫帝王之道推亡固存邇者東西之故胡不聞焉是用一勞師徒四徵饋餉天休人力涌霧屯雲發蜀楚黔滇土著之兵下秦晉吳楚如林之甲婁崖山門之隘平地九衢渭潭河渡之深崇朝一葦賊徒鼠竄僞社幡焚穴擣塗窮登高塞向猶自謂重關百仞可敵萬夫困獸千羣堪資一戰豈知天心旣吐地險何憑死鬪不能詐降不可百道圍而鳥飛絕九坎合而蹇免啼突士盡而鼓聲哀驩歌悲而豔妻訣夫應龍以極惡就經一死安贖是命判屍傳首翼天嚴誅其妻孥黨與七十餘人檻來闕下重者分裂輕者鉗孥自餘在播者下傳近獄有司報治千年守土一旦邱墟伊誰實然豈朕之意於戲漢封遠矣代有棄置蠻夷君長人安與安惟虔劉無度予一人實不忍於赤子亦明天地雖廣日月無私穢無遠而不疏惡無微而可蘊苟有昏暴淫虐蔑常亂紀朕雖欲赦如天弗容其明告口外有土有身視爲前車各戒爾後氛慝初消瘡痍未起師之所處荆棘生焉邑里蕭條哀此筭獨凡蜀楚滇黔有因用兵加派錢糧及一切可緩積逋若詿誤輕條並命所司酌量蠲宥救乏振滯蕩滌煩苛咸興維新安生樂業布告中外俾共聞知萬曆二十九年正月十三日

冊立冊封詔

詔曰蓋聞帝王久安長治之道莫重於崇建元良我祖宗家法相承惟長是立所以厚國本定人心也朕長子常洛孝敬寬仁天鍾粹美奉朕諭教時敏厥修今德器日益端凝學業日益精進尤堪宏受慰朕至懷入敬奏於聖母諭詢今十五日吉授冊寶爲皇太子仰承廟社之靈俯順臣民之望爰封第三子常洵

爲福王第五子常浩爲瑞王第六子常潤爲惠王第七子常瀛爲桂王俾各守藩共維大統典禮既成普天同慶不覃渥恩於戲長男主器益繇有道之長衆子分封茂衍無疆之慶敷子德意咸使聞知萬曆二十九年十月十五日

徽號詔

詔曰朕以涼德嗣承丕基永惟大寶難持無時逸豫賴我聖母在上所以擁翼冲人者三十年於茲罔極深恩未知所報茲者定儲分藩實系慈訓旣成典禮宜備鴻稱是用祇告郊廟社稷率文武羣臣奉冊寶加上聖母慈聖宣文明肅皇太后尊號曰慈聖宣文明肅貞壽端獻皇太后夫天地難酬日月難繪豈能紓予一人之深願庶幾鬯爾萬國之歡心爰考彝章誕宣闡澤於戲慶源遠濬昭百代之徽音渥惠旁流副四方之篤志布告遐邇咸使聞知萬曆二十九年十月三十日

元孫誕生詔

詔曰朕惟自古帝王祈天永命咸曰子子孫孫至於萬年蓋申命用休惟此爲大朕以眇躬嗣登大寶十三年於茲矣瞻惟國本至重懋建元良具舉婚儀廣生絲緒恭荷皇穹純佑列聖厚培以今年十一月十四日皇太子第一子生係欽命選侍王氏出克昌胤祚朕心載寧上鬯聖母之徽懷下發臣民之悅懌宜宣德惠以光典彝於戲元子元孫協震符而淳瑞永年永世流解澤以凝祥詔告萬方咸宜知悉萬曆三十三年十二月十五日

徽號詔

詔曰蓋聞關雎麟趾之化子孫蕃昌實惟父母之德也朕以菲薄纂承祖宗之宏緒仰憑聖母懿訓安享治理三十有四年於茲深惟祧鬯之重茂建元良具舉嘉儀以廣儲嗣今聖母壽躋六袞適誕元孫帝祉宏施豈予一人所能祇受揆厥慶源慈澤之所鍾大矣是用涓今春二月十一日之吉祇告郊廟社稷率文武羣臣奉冊寶加上聖母慈聖宣文明肅貞壽端獻恭熹皇太后光鴻名於彝典昭駿德於海隅慶典具成大賚宜溥於戲貽孫謀以翼子萬年開長發之祥聚大順以怡親四海霑旁流之澤布告中外嘉與同休萬曆三十四年二月十八日

上諡號詔

詔曰朕惟禮先報本難酬罔極之恩孝大尊親式渙綦隆之號代存成憲典合輿情欽惟我皇妣大行慈聖宣文明肅貞壽端獻恭熹皇太后毓秀陰精冥心玄宰含宏光大羣品賴以資生恭儉慈仁六官因之從化夙承皇考嗣啓沖人敬戒不忘劬勞靡替教自家而刑國四十年太平之業允藉鴻麻謀貽子以及孫億萬載有道之長成憑燕翼方舉稀齡之慶遽興大耋之嗟愛日有懷慕更深於五十籲天無計恨莫贖於百身遺誥甫頒悵音容之已隔餘徽尚在景模範以難名特命禮官恪循舊制博諮於衆勿爽其眞擬儼極之尊稱盛美光昭琬琰揚配天之顯烈哀榮徧治埏垓卜以二月二十八日祇告天地宗廟社稷恭上皇妣尊諡曰孝定貞純欽仁端肅弼天祚聖皇太后於戲璇宮旣闕薦遐祉於九京寶冊常新播休

聲於萬壤布告中外悉使聞知萬曆四十二年二月二十九日

遺詔

詔曰朕以沖齡繼承大統君臨海內四十八載於茲享國最長夫復何憾念朕嗣服之初兢兢化理期無負先帝付託比緣多病靜攝有年郊廟弗躬朝講希御封章多滯僚采半空加以礦稅繁興征調四出民生日蹙邊釁漸開夙夜思維不勝追悔方圖改轍嘉興天下維新而遘疾彌留殆不可起蓋愆補過允賴後人皇太子聰明仁孝睿德夙成宜嗣皇帝位尙其修身勤政親賢納諫以永洪圖皇長孫宜及時冊立進學瑞王惠王桂王各擇善地令早就藩封大小臣工務協恭和衷輔理嗣君保乂王室是皆朕惓惓之至意也內閣輔臣亟爲簡任卿貳大僚盡行推補兩次考選并散館科道官俱令授職建言廢棄及礦稅誰誤諸臣酌量起用一切榷稅併新增織造燒造等項悉皆停止各衙門見監人犯俱送法司查審應釋放者釋放師東缺餉宜多發內帑以助軍需陣亡將士速加卹錄喪禮遵舊制以日易月二十七日釋服毋禁民間音樂嫁娶宗室親王藩屏爲重勿得輒離本國各處總督鎮巡三司官地方攸繫不許擅去職守聞喪之日止於本處哭臨三日進香差官代行衛所府州縣并土官並免進香詔告天下咸使聞知萬曆四十八年七月二十三日

光宗貞皇帝

即位詔

詔曰維我皇明運祚隆昌基圖鞏固煌煌大廈聖聖相承我皇考大行皇帝奉天臨民四十八載乾綱在握解澤旁流淵穆端居而慮周海內化成久道而誠切日中方垂恭己之衣忽陟上賓之駁顧命神器畀於眇躬仰遵彌留憑几之言俯循臣庶累箋之請宗社大計弗甚固辭茲於八月初一日祇告天地宗廟社稷卽皇帝位永惟皇考啓佑之深慈嗣服觀揚之匪易有懷兢惕若陟淵冰尙賴文武親賢一心一德惟是邦家彝憲是訓是行屬茲蒞阼之初宜渙維新之號其以明年爲泰昌元年大赦天下與民更始於戲監成憲以罔愆繼述祇承夫志事同民心而出治興釐用協於章程凡在照臨偕臻闡澤布告中外咸使聞知萬曆四十八年八月初一日

遺詔

詔曰朕以眇躬嗣登大寶夙夜祇懼罔敢寧居於凡用人行政遵明皇考遺命力疾舉行哀勞交萃奄至彌留定數未移考終何憾但念朕紹承洪緒猝疚方新志業未就所期贊述端屬後賢皇長子由棟茂質英資克荷神器宜早嗣皇帝位其恪守祖宗彝憲親賢勤學立政安民朝講一遵典制冠婚擇吉蚤行出入起居倍宜兢慎左右侍御務近端良內外文武百執事之臣尙懷隱痛同心協贊永保基圖朕從皇考在天之靈陟降閉觀於志畢矣喪禮依舊制以日易月二十七日釋服毋禁民間音樂嫁娶宗室親郡王藩屏寄重不可輒離封域督撫鎮守都布按三司官員地方攸繫不許擅離職守聞喪之日止於本處哭臨三日進香遣官代行衛所府州縣土官並免進香詔諭中外咸使聞知萬曆四十八年九月初一日

卽位詔

詔曰。維我國家受天明命。累治重熙。列聖相承。代增其德。我皇考大行皇帝元良主器。二十餘年睿質聖資。夙炳靈於天授。禔躬繕性。兼式穀於庭。摹纘鴻圖。誕敷文命。用賢納諫。每率祖以攸行。致治保邦。若惟日之不足。繫克勤與永慕。遽厭世而上賓。顧命眇躬。屬茲神器。朕築築在疚。豈忍遽聞。而文武羣臣。及耆老軍民人等。累箋勸進。辭拒至再。情益懇切。乃遵遺詔。以九月初六日。祇告天地宗廟社稷。卽皇帝位。朕以涼德。方在幼沖。深維上天眷命之隆。祖宗付託之重。孰憑依而攸濟。在典則之作求。惟茲臨御之初。宜有渙頒之號。其以明年爲天啓元年。大赦天下。與民更始。於戲。繼述覲揚。勉率循於無斁。翼爲明聽。尙匡弼之是求。所賴文武親賢。殫乃心力。輔朕不逮。以成我皇考未竟之志。貽爾萬邦無疆之休。布告遐邇。咸宜知悉。萬曆四十八年九月初六日。

上廟號詔

詔曰。朕惟帝王御世。躬明德而致盛治者。其子孫臣庶。必立廟以宗之。稱天以謚之。用是表因心之達孝。亦將示萬世以至公也。洪惟我皇祖考大行皇帝秉乾剛之上德。撫豫大之昌期。以純孝奉慈闡。以至仁調庶品。振綱肅紀。每在篤恭不顯之中。過化存神。聿成端拱無爲之治。威旣著於除殘。禁暴惠猶深於興滅存亡。邇四十八載之浹髓淪肌。若南北東西之懷柔震疊。可謂考三皇五帝而不謬。對二祖八宗爲有

光者矣茲者率土鞠凶普天喪考朕銜哀茹痛勉嗣洪圖深惟繼述之初無若顯揚之大特敕諭文武羣臣稽古禮文博參輿論形容盛德恭薦崇稱乃於九月初十日祇告天地宗廟社稷奉冊寶上皇祖考大行皇帝尊謚曰範天合道哲肅敦簡光文章武安仁止孝顯皇帝廟號神宗於戲耿光大烈揄揚莫罄夫鴻麻纘緒紹基啓佑長思於曠惠布告遐邇咸使聞知萬曆四十八年九月十二日

上尊謚詔

詔曰朕惟孝隆所生詒穀遙追夫聖善禮返自始尊崇式協於情文維盡制以盡倫自率親而率祖榮哀
駢萃淑懿光宣恭惟皇祖妣溫肅端靖純懿皇貴妃粹穆貞姿柔嘉令則恭慎贊中闈之化微效鶴鳴婉
愉奉長樂之慈歡承燕喜備坤儀以毗乾御培震器而勛蒙功主鬯觀成旣參勞於翼子含飴隆愛旋受
祉以詒孫方期介慶於無央倏爾栖真而莫待屬鼎湖將祔期展孝思乃玉几俄憑尙稽成事肆予眇質
奄紹丕基維水有源似續永懷乎啓佑謂地蓋厚慈徽宜馨夫揄揚特命禮官博詢輿誦爰遵永命克舉
上儀儻冊升華像服儻長秋之御易名節惠鴻稱昭永世之辭卜以九月十三日祇告天地宗廟社稷恭
上皇祖妣尊謚曰孝靖溫懿敬讓貞慈參天胤聖皇太后於戲大典承乎先志在天昭聖孝之隆徽音播
爲休聲率士慰母儀之仰布告中外咸使聞知萬曆四十八年九月十四日

上尊謚詔

詔曰朕惟恩隆一本尊崇式備夫上儀禮達重闈徽懿遙光於顯號敷天並戴永世同辭恭惟我皇祖妣

孝端皇后柔順含章安貞厚載培二儀以發育含萬物而化光石鸞銜文已鍾靈於芳族軒龍躍采遂正位於椒塗奉兩宮而齊思媚之賢承九廟而篤迓釐之慶佐一人之宵旰道贊垂衣宏六寢之休嘉慈均佩觸位奠承華之主器德並恩勤祥徵興慶之含飴勞深啓佑萬年作述謀燕子以貽孫四紀昇平教刑家而化國方忻愛日遽謝長秋我皇祖感故劍而興懷肆沖人撫遺棬而增慟非借綦隆之典曷伸罔極之思魯頌姜嫄特重闕宮之報詩稱文母亦登清廟之歌爰命禮臣式稽成憲博參輿論共贊懿章萃愛戴於臣鄰誠通□史摹芳徽於琬琰禮備榮哀卜以九月十三日祇告天地宗廟社稷恭上皇祖妣孝端皇后尊謚曰孝端貞恪莊惠仁明婉天毓聖顯皇后於戲瑤牒恆新賁幽光於有赫鴻名不朽繙英爽以如存布告中外咸使聞知萬厯四十八年九月十四日

上廟號詔

詔曰朕惟在昔聖帝明王德盛化神臣民頌戴繼統之君鋪揚休烈昭宣徽稱光於四方垂諸萬世於以顯親崇孝典至重已恭惟皇考大行皇帝聰明天縱仁孝性成震潛勵就將之功離照章繼述之美任賢若渴下令如流發帑金以給軍興撤稅璫而拯民瘼休聲四洽湛澤旁周雖照臨甫閱旬時而俄頃同流天地治平之效日異月新夫何諒陰未幾上賓不待率土均喪考之痛沖人切紹庭之思維繼序之不忘詎追崇之敢後謹命文武羣臣博詢輿誦參協彝章僉言既同上儀肇舉乃於今年十月十六日祇告天地宗廟社稷奉冊寶恭上皇考大行皇帝尊謚曰崇天契道英睿恭純憲文景武淵仁懿孝貞皇帝廟號

光宗於戲帝德難名卽揄揚之未罄皇建有極惟昭示以永存布告萬方咸使知悉泰昌元年十月十七日

上謚號詔

詔曰朕惟慈恩罔極報莫殫夫追崇殷禮告成情實均於遐邇惟爰天而升秩號宜率土之共尊親恭惟皇妣恭靜端懿溫惠元妃淑穆純姿柔明至性當重闈底豫佐盟饋以承歡宏六寢休嘉普衾裯而著惠維茲慶澤誕啓沖人愛不異於裏毛恩勤備至道猶先於燕翼訓迪彌周深懷長發之祥永結終天之慕乃龍軒之儀未正而鸞馭之景俄淪先皇軫故劍之思有懷儻極嗣朕享垂衣之佑並舉升尊仰日月之光華盛德難窮繪畫履露霜之悽愴榮名用寄瞻依爰命禮臣并參輿論敬循穆卜照薦崇稱於十一月初三日祇告天地宗廟社稷恭上尊謚曰孝元昭懿哲惠莊仁合天弼聖貞皇后於戲勝疊情通神理貫幽明而不昧哀榮禮備芳徽被寰宇以常尊布告中外咸使聞知泰昌元年十一月初四日

上謚號詔

詔曰朕惟孝隆一本恩重所生自非肇殷禮以追崇何以報慈劬於罔極祖宗列聖彝章具存銜恤酬恩於朕爲猶切焉恭惟皇妣昭肅恭和章懿才人懿德夙成徽音克嗣爰從潛邸佐睿聖之修逮事重闈宣肅雍之化宮掖仰其儀法和慶毓爲休祥祐命自天誕育眇質保護寧惟顧復誨提兼極愛勞朕得以蒙被恩勤底於成立奄承基緒獲奉宗祧揆厥慶源何莫非慈恩啓佑之詒也顧音儀睽侍驚三載之居諸

帷几瞻依結終天之隱痛永言孺慕鬱有哀思屬嚴考之上賓肆鴻儀之並展升尊儼極昭薦崇稱於十一月初三日祇告天地宗廟社稷恭上尊謚曰孝和恭獻溫穆徽慈諧天鞠聖皇太后於戲聖善難摹秩號祇從夫節惠孝思不匱榮哀期偏於邇遐誕告萬方咸使知悉泰昌元年十一月初四日

冊立中宮詔

詔曰朕惟君統天下以爲家后輔一人而正內故大婚彝倫之本風化所基聖人謹焉朕以冲齡嗣膺寶厤惟是宗祧重計夙夜祇念茲者遵承皇考詔命特諭所司簡求令淑作配朕躬是用祇告天地宗廟於天啓元年四月二十七日冊立張氏爲皇后正中闈而奉九廟帥六壺以式萬方茂開祚胤之祥丕衍邦家之慶布告中外咸使聞知天啓元年四月二十九日

皇子誕生詔

詔曰朕惟自古帝王續圖緜厤率隆胤祚以重宗祧朕以眇躬紹承洪緒夙夜祇念皇祖皇考儲祇垂庥詒孫翼子所望早昌嗣續以慰在天之靈蓋三年於茲乃荷皇穹眷佑九廟居歆以今年十月二十二日皇子誕生係皇貴妃范氏出嘉慶集於邦家歡悰洽乎億兆肆頒渥澤覃被多方於戲震得男而應索道開長發之祥巽申命以疏恩用佐維新之政布告中外咸使聞知天啓三年十月十六日

皇子誕生詔

詔曰國家柔德存仁聞馨受祉天必錫予胤嗣以昌世衍祚於無疆朕卽位以來夙夜祇畏罔敢怠荒冀

圖所以崇昭格而大庥美。幸賴玄穹垂眷。暨我皇祖皇考丕顯之靈。以今年十月初一日誕生皇子爲容妃任氏所出。是日寶廡初頒。千官拜舞。而慶從天錫。喜自外傳。知爾萬方普同歡悅。特援舊典。用沛新恩。於戲。周嗣振振。敢忘仁厚之訓。堯天蕩蕩。用成雍治之休。恪爾奉行。服我新政。播告中外。咸使聞知。天啓五年十月二十五日。

懷宗端皇帝

即位詔

詔曰。我國家列聖。纘承休烈。化隆俗美。累洽重熙。遠垂萬熙。我大行皇帝仁度通天。英謨憲古。勵精宵旰。銳慮安攘。海宇快覩。維新疆土。勤思恢復。萬機總攬。六幕禔麻。方啓鴻圖。忽賓龍馭。爰膺顧命。及予眇躬。驚聞憑几之言。凜念承祧之重。而文武羣臣及軍民耆老。合詞勸進。至於再三。辭拒弗獲。乃仰遵遺詔。於八月二十有四日。祇告天地宗廟社稷。卽皇帝位。以明年爲崇禎元年。朕以冲人統承鴻業。祖功宗德。惟祇服於典章。吏治民艱。將求宜於通變。毗爾中外文武之賢。諧予股肱耳目之用。光昭舊緒。愈懋新猷。於戲。茲景命維新。嘉興更始。鑒於先王。成憲庶永無愆。乃若宣布詔書。俾阻深之咸耀。匡扶不逮。使次第而可行。惟爾百司。興朕一德。播告天下。咸使聞知。天啓七年八月二十四日。

冊立中宮詔

詔曰。朕聞坤順承乾。兩儀迺以奠位。內治贊外。六合斯以蒙休。王化攸關。典禮是式。朕荷天眷。命序纘洪

圖深惟儀刑於萬國宜首崇位於母儀妃周氏受命先帝配朕潛邸含章體順懿範克紹前徽率禮蹈謙淑德允稱作合是用祇告天地宗廟社稷以天啓七年九月二十七日冊立爲皇后正位中宮於戲佐一人以主鬯宏開有道之長叶三靈以永綏益衍無疆之慶布告中外咸使聞知天啓七年九月二十八日

冊封懿安皇后詔

詔曰朕嗣承大統丕煥新猷凡厥典章必稽祖制爰溯世宗入繼之始特崇莊肅皇后之稱友愛篤於因心芳聲昭於國史聿懷前烈豈敢或愆敬惟皇嫂皇后發祥瑤室正位璇宮道合靜貞性鍾仁孝先皇久資內助宗廟夙享馨香陰教用章徽音嗣美是用仰參舊典備舉隆儀以正月二十日祇告天地宗廟社稷恭上尊號曰懿安皇后於戲追龍馭於鼎湖式重倪天之配光鴻名於玉冊永垂奕世之庥布告四方所宜知悉崇禎元年正月二十二日

誕生太子詔

詔曰朕惟帝王膺天庥而奉宗祧首重元儲尤隆世嫡朕以眇躬嗣服丕基夙夜祇念我皇祖皇考集慶發祥源深緒遠佇昌嗣續仰慰貽謀茲荷上帝居歆宗社垂佑以今年二月初四日第一子生係皇后周氏出中闈開家胤之先萬國恆元良之祝肆頌渥澤覃被多方於戲震祥肇毓坤元贊乾始以凝庥換號鴻宣解澤麗巽申而布命誕告中外咸使聞知崇禎二年三月初九日

冊立東宮詔

詔曰朕惟自古帝王嗣大麻服長治久安莫不首重建儲所以定宗祧隆國本凝天眷而繫人心也我祖宗列聖相承德祚縣洽率繇茲道以裕貽謀朕祇紹丕基兢懷付託乃荷皇穹眷佑胤嗣蚤開長子慈烺睿託坤元祥鍾震一中外起敬承之頌天人表協應之符昨者文武臣名疏請再三舉行冊禮而朕以子方襁褓謙讓未遑茲屆青陽載仲之辰正值蒼巽誕彌之月禮官復申前請衆志誠難固違爰考舊章式諭吉日祇告於天地宗廟社稷授冊寶立慈烺爲皇太子以仰繩累葉無疆之緒俯慰兆人胥戴之情大典考成環垓同慶於戲位定承乾恩覃申巽惟嫡惟長萃全盛而行重熙是錫是敷保庶民以歸皇極播告天下咸使聞知崇禎三年二月初十日

明書卷五十六

志六

禮儀志一

史官論曰夫禮者人治之大聖有專經史有專志子思氏有言曰非天子不議禮善乎明太祖之詔天下也曰朕聞三皇立極導民以時庖廚稼穡衣服始制民居奠焉五帝教以仁義益未備之時宜天下從之民用和睦自周至於漢唐宋增損益周國乃用昌民受咸和家用永康朕蒙皇天后土眷命祖宗之靈統一天下紀元五年朕本草芥失習聖經況擢強拊順二十餘年居無寧日故理道未臻民不見化鄉閭市里尙染元俗天下大定禮儀風俗可不正歟茲條畫事宜再整彝倫恤念孤寡務遵先王之法顧以德薄恩澤未孚下民未悅恐貽上天之怒夙夜祇懼若履淵冰咨爾臣庶體予至懷期臻禮儀之風永底昇平之治已又詔翰林院作稽古定制書先是時禮尙書崔亮言禮者理也人心之理協之以同然卽百世可通也故元王祭無樂大臣無廟仕者不奔祖父之喪無功總之假冠婚任俗飲射具文民無定志而濫士異學而莫止伶人道流秉禮司頌齊民下賤踰格犯分雖有洪武禮制而莫之或行夫國無禮猶水無坊人無禮猶室無基衝噏圯毀夫焉有極宜徵四方明道奧學之儒萃於京師準以典誥案以三禮參以時

之詠歌。孔氏遺言。皆比以今法。寧要無繁。寧徑無易。裁成明典。以行之天下。垂後世範俗同德。上善其言。令天下舉耆儒宿學博聞通古之士。禮送京師與纂修。而曾魯、何克寬、陶凱、胡翰、徐一夔、梁寅、周子諒等。咸集以吉凶軍賓嘉及冠服車輅儀仗鹵簿字學樂律爲綱。凡儀度名數沿革爲目。書成命曰大明集禮。及定郊祀典制。上曰。凡祭享之禮。載牲致帛。交於神明。費出已帑。神明歆之。如庶人陌錢瓣香皆可格。不以菲薄而不享者。何以所得之物皆力所致。若國家倉廩府庫乃生民脂膏。以爲尊醪俎饌。充實神庭。徼求福祿。以私其身。神可欺乎。惟爲國爲民禱祈。如水旱疾疫師旅之類是矣。於朝常禮成諭中書曰。朝廷之禮。所以辨上下正名分。不以賤加貴。不以卑踰尊。百官在列。班序有倫。奏對雍容。不失其序。非惟朝廷尊。亦天下瞻仰所在也。今百官朝參奏事。禮儀多未嫻。自今定制。不如儀者罪之。及禮官申朝儀復諭曰。禮儀者朝廷之表。有虞時羣后德讓。百僚師師。其申諭百官。景行古人。無敗度取戾。及孝慈錄成。敕學士濂曰。養生送死。聖王之大政。諱亡忌疾。衰世之陋習。三代喪禮節文尤詳。而散於衰周。厄於暴秦漢唐。以降莫能議此。夫人情有無窮之變。而禮爲通變之宜。得人心之所安。卽天理之所在。其以考定喪禮頒布之。及定天下房舍服色之等第。則諭廷臣曰。古者帝王之治天下。必定禮制。以辨貴賤。明等威。是以漢高初興。卽有衣錦繡綺縠之禁。歷代皆然。近世風俗相承。流於僭侈。閭里之民。服食居處。與公卿無異。而奴僕賤隸。往往侈肆。貴賤無等。僭禮踰度。此元之失政也。其行禁之一日。上從容謂禮官曰。禮者所以美教化而定民志。成周設大司徒。以五禮防民之僞。而教之中。夫制中莫如禮。修政莫如禮。齊家莫如禮。故有

禮則治無禮則亂居家有禮則長幼序宗族和朝廷有禮則尊卑定等威辨元興以夷變夏民染其風先王之禮幾乎熄矣而人情狃於淺近未能猝變今命爾稽考典禮合於古而宜於今者詳定之布天下俾習以成化庶幾復古之制及禮官上所定禮儀上覽之慨然曰禮者國之防範人道之紀綱朝廷所當先務不可一日無自元氏廢棄禮教因循百年而中國之禮變易幾盡朕卽位以來夙夜不忘思有以振舉之以洗滌汙俗爾所定禮儀今雖已成宜更與諸儒參詳考訂斟酌先王之典以復中國之舊務合人情永爲定式庶幾愜朕心也於是禮官集翰林學士以下雜議反復審慎定爲禮每裁定條上之上允乃列諸典冊觀此則明之爲禮也可知矣今按典制司於儀制者首朝賀次朝儀次冊立次上號次大禮次講讀次軍禮次監國次王國次蕃國次冠禮次婚禮次宴禮次頒降而司於祠祭者首郊廟次墳陵次羣祀次喪禮次雜禮次有司應行禮次品官庶人四禮列著於篇第以增定者爲則初儀不具

○朝賀

正旦冬至百官朝賀儀

凡正旦冬至前一日尙寶設寶案於皇極殿寶座之東鴻臚司設表案二於殿東中門外欽天監設定時鼓於文昭閣教坊司設中和韶樂殿內東西設大樂於皇極門內至期錦衣衛陳鹵簿儀仗於丹陛及墀設朋扇於殿內陳輦轂於皇極門墀中金吾衛列甲士於門外旗首衛設金鼓於午門列旌旗於皇極門御馬監設仗馬馴象所設象於墀欽天監設報時位於丹陛東鼓初嚴百官朝服於午門候次嚴百官及

進表人員四夷人等入丹墀立。欽天監預鶴唱官於文昭閣下。而將軍六員在殿內分列。又四員於丹陛四隅及侍衛將軍各分立。鳴鞭四人立於中。護衛官二十四員立丹陛南。四員立陛北。設方物及撤案。以序班十六員於丹陛左右外贊則鳴贊十二員立糾儀御史十二員殿前錦衣六員光祿四員序班二員傳呼鳴鞭者錦衣四員俱列殿門外。導表六科官二員序班二員於表案左右掌領侍衛官及錦衣指揮百戶司簾者於簾下俟捲簾畢趨出鼓三嚴則有殿中侍班翰林院官四員糾儀御史四員中書官四員序班二員及各遺祭官而執事禮部堂上官內鳴贊設表案并舉案官序班五員典儀鴻臚一員捧表禮部司官四員展表則大卿貳二員宣表致詞傳制鴻臚五員捧寶尚寶官二員導駕六科給事中十員俱詣中極殿外候上具袞冕升座鐘止序立遺祭官以次復命訖各趨向丹墀班內禮部官跪奏方物得旨復位鴻臚卿跪奏執事官行禮五拜三叩頭畢鴻臚跪奏請陞殿駕輿導駕官前導捧寶於前中和樂作上御寶座導駕侍班及糾儀御史各序立置寶於案分立樂止鳴鞭報時鶴唱訖外贊唱排班班齊鞠躬大樂作四拜興平身樂止以後凡拜樂如之內贊進表宣表展表皆跪俯伏興平身宣表官退移表案外贊跪衆官皆跪代致詞官跪於中致詞云公侯駟馬伯文武百官某官臣某等茲遇

正旦則云三陽開泰萬物咸新冬至則云律應黃鍾

日當是至恭惟皇帝陛下膺乾納祐奉天永昌賀訖四拜傳制官奏傳制俯伏興乃由東門至丹陛東立稱有

制外贊跪乃宣制。正旦則云履端之慶。與卿等同之。宣訖贊俯伏興平身摺笏三舞蹈贊山呼百官拱手

冬至則云履長之慶。

與卿等同之。宣訖贊俯伏興平身摺笏三舞蹈贊山呼百官拱手

加額呼萬歲三次曰萬萬歲樂工軍校齊聲應之復四拜鴻臚卿跪奏禮畢鳴鞭中和樂作駕興捧寶導
駕至中極殿樂止引班官引百官以次出序班撤方物案乃設黃幄於丹陛上陳王府勳臣總兵及四夷
所進馬閱之畢駕還宮。

冬至大祀慶成儀

舊制冬至卽行賀禮後以分祀二郊以冬至大報是日行慶成禮次日賀。

帝大祀禮成駕還百官具朝服立迎於金水橋南隨至皇極殿丹墀內侍立執事官先至殿前東西立候
上御中極殿具袞冕服陞座鴻臚寺卿跪奏執事官行禮鳴贊贊入班鞠躬五拜三叩頭興平身各供事
遂奏請陞殿樂作上御皇極殿樂止鳴鞭傳排班鳴贊贊排班齊鞠躬五拜叩頭興平身又贊跪鴻臚
卿於丹陛中道跪致詞云公侯駙馬伯文武百官某官某等恭惟圜丘大報載成禮當慶賀畢由東門入
殿內侍立又四拜奏禮畢贊禮畢鳴鞭上還宮百官退。

萬壽聖節朝賀儀

儀與正旦冬至同但致詞云恭惟皇帝陛下萬壽聖節臣某等誠懼誠忭敬祝萬萬歲壽不傳制但加設

玉帛案二於殿內簾前。

凡遇大朝賀衍聖公一班。大學士一班。尚書都御史真人一班。侍郎寺正卿一班。而詹翰除部銜入本班。開坊以上列諸少卿前史官列光祿少卿前庶吉士列光祿寺丞前科道爲一班。次六部司官後以品序。凡郊祀先期七日。聖節正旦冬至先期三日。百官具吉服於靈濟宮習儀致詞。以勳臣班首官缺則禮部題請俱鴻臚卿代。後以衍聖公及三氏子孫三年入賀。待以賓禮不朝參。

中宮正旦冬至命婦朝賀儀

前期一日女官設御座於宮中。設香案於丹墀之南。陳儀仗及女官之擎執者於御座及丹陛丹墀。陳女樂於丹陛東西北向。設箋案殿東門外。設司贊位於丹墀東西。司賓位於命婦班北。東西相向。命婦至宮門外。司賓引入就拜位。尚宮尚儀等詣內奉迎請陞座。皇后具服出導從如常樂作陞座。樂止。司贊唱班齊樂作。贊四拜。樂止。已後凡拜作止皆如之。內贊唱進箋。引箋案女官前導。舉箋案女官舉案由殿東門入樂作。至殿中。樂止。贊衆命婦跪。女官宣箋目訖。興唱宣箋。展箋女官取箋。宣箋女官宣訖。舉案於殿東。贊命婦皆興。司賓引班首陞於東階。樂作。由殿東門入。樂止。內贊唱跪。外贊唱皆跪。班首稱某夫人妾某氏等茲遇。與皇帝同敬詣殿下稱賀。致詞皆以司言女言代。內外皆興。由西門出。樂作降自西階。樂止後四拜。

司賓將旨至於丹陛。稱有旨。跪。司言宣旨。如皇帝但云興夫人等同之。興又四拜。尚儀奏禮畢。皇后興樂作還宮。樂止。命婦出。

中宮千秋節命婦朝賀儀

興正旦冬至同。但致詞云茲遇千秋令節敬詣皇后殿下稱賀不傳旨。○凡命婦應朝賀者各照其夫品級執禮部印信票清晨由各門從便入。

東宮親王及妃正旦冬至宮中朝賀儀

凡正旦冬至日上陞乾清宮御座引禮引皇太子及妃親王及妃詣上位前贊禮贊鞠躬四拜平身皇太子親王皆鞠躬四拜平身太子妃親王妃皆四拜後如之贊禮引皇太子跪致詞後皆跪皇太子稱長子某茲遇履端長之節謹率諸弟某等欽詣父皇陛下稱賀贊俯伏興平身皇太子等皆然妃止四拜興復位再行四拜禮畢。○引禮引皇太子等詣中宮前禮同。但致詞云恭詣母后殿下稱賀畢皆出後多不致詞。○朝太后儀多改致辭。

東宮正旦冬至百官朝賀儀

凡遇正旦冬至典璽官設東宮座於文華殿中錦衣陳儀仗教坊陳大樂府軍衛列甲士旗幟於門外殿門及門外列將軍十二人餘設箋案及入拜宣箋目宣箋皆如大朝賀止四拜不山呼致詞則云某官臣某等茲遇同皇帝敬惟皇太子殿下茂膺景福賀畢傳有令宣令云履端長之節同臻嘉慶又四拜儀禮跪啓禮畢還宮百官出。○千秋節同。但致詞云茲遇皇太子殿下壽誕之辰臣某等敬祝千秋壽不宣令。

東宮妃正旦冬至命婦朝賀儀

女官設東宮妃座於東宮儀如朝中宮但致詞云某夫人妾某氏等茲遇履端之節敬詣皇太子妃殿下

長

稱賀

聖節正旦冬至天下司府州縣慶祝儀

凡遇其日各地方設黃幄龍牌於公廳各官具朝服行舞蹈山呼十四拜禮如大慶賀告天祝壽曰某衙門某官臣某等荷國厚恩叨享祿位皆賴天生我君保民致治今茲〔正旦〕〔冬至〕〔聖誕〕聖壽益增臣等下情無任忻躍感戴之至

○朝儀

朔望朝儀

凡朔望日上服皮弁服百官皆具公服常朝序立於丹墀東西相向謝恩見辭官序立於皇極門外北向候上陞座鳴鞭贊排班樂作行一拜三叩頭禮畢樂止鴻臚司奏謝恩見辭行五拜三叩頭禮畢鳴鞭駕還宮百官出初班首官出班鞠躬云某官臣某等起居贊禮云聖躬萬福後免行起居禮

常朝御殿儀

凡蚤朝文官自左掖門武官自右掖門入如中極殿朝至鹿頂內行禮訖就侍立位各衙門官以次行禮

訖不入內侍官至鹿頂外北向立鳴鞭以次出○如皇極殿朝俱於中極殿行禮奏事畢四品以上及翰林院官科道官於中左中右門候鳴鞭各詣殿內序立餘官在丹墀重行北面立候朝退以次出○如先於皇極殿朝後卻奏事者文武於丹墀依序重行北向立候鳴鞭行禮訖百官如前入及立候謝恩見辭人員行禮訖鳴鞭捲班退有事奏者於皇極門或中極殿進奏無事奏者以次出失儀者監察御史面糾三品以上不面糾具本糾候旨行大朝賀不面糾

常朝御門儀

凡蚤朝鼓起百官各於左右掖門序立候鐘鳴開門進過金水橋至皇極門東西相向立候上御寶座鳴鞭行一拜三叩頭禮分班鴻臚官宣念謝恩見辭人員傳贊午門外行禮畢各衙門奏事畢糾儀無失儀者不糾鳴鞭駕輿百官出○凡午朝上御左順門先期設御座設案文武執事奏事官候駕出各序立內門五府六部翰林院官六科官俱案西序立侍班御史序班將軍俱案南北向鴻臚錦衣管將軍及侍衛立將軍西各衙門以次奏事如機密重情許赴御前奏後設記注史官四員在御座西稍南班各科臣上後令翰林官有事先羣臣奏○晚朝惟洪武時行後革

忌辰朝儀

凡遇各廟忌辰上服淺淡服御皇極門或西角門視事不鳴鐘鼓不行賞罰不舉音樂百官各具烏紗帽淺淡服烏角帶朝參後服青綠如奏祭祀奏者服紅後多輟朝參奏事

輶朝儀

凡聞皇妃喪，輶朝三日發引下葬，免一日親王喪三日公主喪一日，至日不鳴鐘鼓，不鳴鞭，不設儀仗。上及百官各服如忌辰服於皇極門朝參，其謝恩見辭官員亦不用公服，如常朝官服色。

諸王朝見儀

凡各王大朝行八拜禮，常朝一拜三叩頭禮。凡伯叔兄見天子在朝行君臣禮，於便殿行家人禮。伯叔兄坐東面西，坐受天子四拜。伯叔兄就於受禮位坐，天子正中南面坐。

外戚朝見儀

凡皇后父見上行君臣禮，后見父母行家人禮。皇太子見皇后父母，皇后父母東立。皇太子行四拜禮。皇后父母答兩拜。

諸司朝覲儀

凡天下官員朝覲至京，自十二月十六日爲始，鴻臚寺官陸續引見，二十五日以後，每常朝方面官隨京官行禮於文班序立，降京官一等知府於午門外行禮。正月初一大朝會以後，方面官隨班知府以下在皇極門外金水橋分東西序立，如常朝各行禮。○凡大班糾劾朝覲考察官鴻臚引上御路，法司及科道官各露章糾劾待職之罪，朝覲俱俯伏免冠待罪，候旨如奉旨免宥加冠叩頭連呼萬歲，次日謝恩如常儀。○凡獎賞廉能於會極門設御座，百官先行一拜三叩頭禮，內閣并吏部都察院堂上官禮部錦衣掌

印官吏掌科、河南掌道、禮部郎中俱於御座東面北序立。鴻臚寺官引廉能官上小礪礪跪。吏部等官過跪。吏部堂上官奏後面跪的是廉能官。見在應朝某省某等官某等若干員奉旨引來聽候獎賞。奏知畢起一躬入班。廉能官叩頭候上語獎諭承旨。上又說與他每賞賜鴻臚禮部承旨叩頭起。俱一揖一躬引下。吏部等官過致詞云。仰惟皇上留心吏治。澤被生民。臣等不勝慶忭。叩頭稱賀畢起一揖一躬入班畢。駕輿各官退。

東宮朝儀

凡朔望日文武百官朝退詣文華殿門外分東西侍立候皇太子陞殿樂作百官行一拜禮其謝恩見辭。官員亦隨班行禮畢。皇太子興入以次出。若啓事百官皆稱臣。

凡朝參官出入以班列。攬越者糾儀御史參罰。

登極儀

洪武初。圜丘告祭禮成。校尉設金椅於郊壇前之東南向。設冕服案於金椅前後。望瘞畢。丞相以下於望瘞位跪奏曰。告祭禮成。請卽皇帝位。羣臣扶擁至金椅上坐。百官先排班執事官舉冕服案寶案至前。大臣奉袞冕進至案上。丞相爲上加袞冕入班唱排班班齊鞠躬樂作四拜平身樂止以後樂之作止皆如之。班首至上前跪摺笏百官皆跪捧寶丞相奉寶上言。皇帝進登大位。臣等謹上御寶。尚寶卿收寶訖。一拜百官如之。復位兩拜三舞蹈三叩頭三山呼。又一拜定再鞠躬四拜上興百官捲班退具鹵簿導從入。

太廟追尊仍告祀社稷各行禮御奉天殿百官上表賀先期布列各官及鹵簿儀衛五輅幢幡儀仗等各如儀鼓初嚴百官具朝服次嚴各依品從齊班於午門外以北爲上東西相向通班贊禮及宿衛等官入就位諸侍衛各服其器服及尙寶卿侍從官入鼓三嚴百官入各就位上麥冕陞座大樂鼓吹振作樂止捲簾安寶鳴鞭引班官引百官北面立樂作至立定樂止唱班齊樂作四拜樂止已後樂如之遂端表案捧表官捧表置案上展表官展訖宣訖皆跪俯興復位四拜三舞蹈山呼萬歲衆擊鼓齊聲應之俯伏興平身又四拜賀畢遂冊皇后立皇太子以卽位詔告天○凡嗣位公侯等上箋勸進者三令旨俞允有定期先一日陳設鹵簿儀仗車輅設中和樂而不作設雲蓋於承天門上設雲輿於午門外設宣讀案於承天門上西南面是日蚤遣官祇告天地宗廟社稷上具孝服詣大行皇帝几筵祇告受命畢卽於奉天殿具冕服行告天地禮赴奉先殿謁告祖宗畢詣大行皇帝几筵前行五拜三叩頭禮畢詣母后前行五拜三叩頭禮畢詣奉天殿卽位百官具朝服入丹墀候鴻臚司官引執事官進至華蓋殿行禮畢陞殿御寶座鳴鞭百官上表稱賀上命免賀行五拜三叩頭禮畢出承天門外候翰林官齋詔書用寶訖請頒詔翰林捧詔授禮部上還宮詔出午門錦衣奉入雲蓋導至承天門開讀如常儀

○冊立附誕生命名

凡冊立先期設御座於奉天殿如常儀尙寶卿設寶案於御座前侍儀設冊寶案冊東寶西設奉節官承

制官奉册官奉寶官又預奏定正使副使又設受冊寶擇位餘侍班護衛鹵簿儀衛如常禮部設龍亭儀仗大樂於奉天門外正中以俟迎冊寶至中宮鼓嚴三次陞座捲簾鳴鞭報時鶴唱如常禮部官捧冊寶置於案奉節奉制奉冊奉寶及掌節官各入殿就上位西向立行四拜禮樂作樂止如常乃宣制承制官宣制曰冊妃某氏爲皇后命卿等持節展禮宣訖復位唱俯伏興奉冊寶官舉冊寶節皆以次授受皆摺笏跪受興退復位又大班四拜遂持節前導舉案次之出奉天門置龍亭官在後節在前初冊寶將出門跪奏禮畢上還百官出○受冊寶儀先一日內使陳設如常其日設儀仗及擎執者陳樂於殿庭冊寶將至尚儀奏請皇后首飾緝衣出閣至殿南面立樂作樂止俱如常儀冊寶至宮門使副取冊寶置門外先設案上前稱冊福使臣某副使臣某奉制授皇后冊寶退復位內使監令入詣皇后殿言訖出復位引諸命婦入就拜位讀冊寶內官及司贊內官俱就位引禮引冊寶使以冊寶授內使監令各奉冊寶入詣皇后受冊位前皇后降詣庭中內使監令跪以次奉皇后跪以次受訖乃讀冊寶收訖尚儀奏拜興樂作四拜興樂止內使傳使副稱皇后受冊禮畢使副退詣奉天殿再拜復位引禮又引外命婦如內命婦儀復位尚儀奉禮平身退○初皇后受冊寶訖陞座引禮引內命婦班首一人詣殿中再拜跪致詞曰茲遇皇后殿下膺受冊寶正位中宮妾等不勝歡慶謹奉賀拜興再拜興復位引禮又引外命婦如內命婦儀復位尚儀奉禮畢皇后降座樂作還閣樂止命婦出○百官次日稱賀上表箋儀同大慶賀儀奉表後班首官跪奉箋內使接箋入中宮啓聞餘如儀○後更定先期三日遣官祭告天地宗廟○後增定慶賀皇太后儀○皇后

謁告奉先殿八拜。至上前謝恩八拜。公主等及宮官四拜。上箋如常儀。親王於上位前行慶賀。次詣皇后前。次詣皇后前俱八拜禮。如常儀。○命婦慶賀皇太后如慶賀皇后儀。○皇帝皇后謁廟儀。○前期太常奏皇帝尚儀奏皇后及妃各齋三日。內外執事官各齋一日。至期太常光祿奏省牲如常儀。所司陳設如時祫儀。是日有司嚴整以俟。錦衣衛備儀衛如常儀。內使監設皇帝、皇后及妃肩輿於各宮。先備輅於奉天門中。宮妃翟車於輅後。中外嚴辦。皇帝、皇后及妃各陞出宮。出奉天門陞輅后及妃升車。內外護衛儀仗從女官遮以幃幕。至太廟大門。皇帝降輅。皇后妃降車。障以龍幃。導駕官導皇帝后妃於後寢。先是命官捧七廟主陞神御座。至是皇帝捧太祖。皇后捧孝慈皇后主。出陞神御座。執事官各司其事。奏就位。皇帝后妃皆就位。樂作。摺圭上香。出圭復位。樂止。四拜行初獻禮。樂作。皇帝摺圭奠帛進爵。先太祖次孝慈高皇后出圭復位。各廟捧主官至此皆上香。奠帛獻爵訖退。奏跪讀祝。樂止。跪讀訖。樂作。俯伏興平身。樂止。典儀唱行亞獻禮。樂作。女官啓妃行同亞獻。但一妃獻太祖。一妃獻高皇后畢。樂止。皇帝飲福酒受胙。皆跪如常儀。四拜。樂作止。如常奏禮畢。復四拜。捧帛祝燎。皇帝奉太祖神主。皇后奉高皇后神主。納櫃訖。出陞輅。凡陞輅陞輿。教坊跪奏樂。駕輿鼓吹振作。還宮解嚴。

皇妃冊立儀

凡冊妃與冊后禮同。先期翰林院具祭文。上及皇妃各具服。率詣奉先殿行謁告禮。如常儀。畢。妃詣上前

行八拜禮畢。詣皇太后及皇后俱八拜禮謝恩畢。宮中設皇妃座。陳儀仗女官俟。皇妃謝恩回宮陞座。長公主。公主。各親王妃行四拜禮。次引六尚女官。又次引四品以上命婦俱行四拜禮。後定是日寅刻上具服告於皇祖。分遣文武大臣告列聖宗廟。乃御殿行禮。

皇嬪冊立儀

凡冊嬪如冊妃儀。但宣制曰。某年某月某日冊某氏爲德嬪、賢嬪、莊嬪、麗嬪、惠嬪、安嬪、和嬪、僖嬪、康嬪。餘如儀。但不受拜賀耳。

皇太子冊立儀

凡冊立皇太子。洪武定受冊寶於殿上。宣德以後。則命使持節至文華殿授皇太子遇冊立事。先期定官位及儀仗侍班如常。鼓三嚴。上御謹身殿具袞冕。啓請皇太子於奉天門具冕服。百官僧道耆老人等入立班。及上御奉天殿。大樂鳴鞭報時鶴唱訖。引進四人引皇太子入奉天門。樂作自東階東門入內贊接。引至丹陛拜位。樂止。捧冊寶官俱入俟。皇太子兩拜。凡拜。樂作。樂止如常。遂傳制皇太子跪。宣制曰。冊長子某爲皇太子。宣畢。俯伏興平身。復兩拜。遂授冊。受冊授寶。受寶俱跪。先摺圭。後出圭。俯伏興平身。引皇太子出樂作。復位。捧冊寶導皇太子行四拜禮。內使昇冊寶亭前導。皇太子出奉天門。樂作。樂止如常。儀仗鼓吹百官送至東宮。安奉冊寶。初皇太子禮畢降階。禮部尚書跪奏用寶。捧詔書用寶訖。赴午門開讀。由中門出奉天門。樂作。樂止如常。午門開讀。百官迎詔至中書省頒行執事官奏禮畢。鳴鞭上興。樂作。還

宮樂止。○後受於文華殿。加使如冊立皇后儀。○是日皇太子朝謝中宮。致詞云。小子某茲受冊命。謹詣母后殿下恭謝。諸王賀東宮致詞曰。小弟某茲遇長兄皇太子榮膺冊寶。不勝忻忭之至。謹率諸弟詣殿下稱賀。百官進慶賀表箋。又進慶賀東宮箋。內外命婦慶賀中宮。遂擇日皇太子謁廟。若有梓宮在殯。則樂設而不作。明日奉先殿行禮畢。仍詣几筵謁告。若皇太子尙幼。冊使捧冊寶至左順門。授內臣捧入禮。皆保姆奉皇太子行。或保姆竟代先期。皆遣官祭告天地宗廟社稷如常儀。

皇太子妃冊立儀

凡冊立皇太子妃。前一日。內官設節冊案於東宮內殿。設香案於其南。女樂儀仗如常儀。至日。正副使等官持節捧冊至左順門。以節授內官。入行禮。北面立俟報。內官持節由正門入。引禮請皇太子妃具禮服。宮人執扇迎於宮門外。入妃至拜位。內官置節冊於案。四拜跪受冊。摺圭出圭如常興復四拜。禮畢。內官持節出。妃送出宮門外。內官報使臣禮畢。使臣復命。妃乃具禮服。奉先殿行謁告禮。如常儀。女官導。妃宮門上皮弁服。皇后燕居冠服陞座。妃行八拜禮畢。詣皇妃前四拜。回宮。詣皇太子前四拜。妃陞座。王妃公主郡主宮官應賀者。於丹墀行四拜。禮畢各退。

親王冊立儀

凡冊立親王。洪武初。皇帝預告太廟。及期。臨軒拜冊。年幼者遣官保抱以從事。後卽日告。內殿庭遣節使就各王府冊立之。罷預告臨軒之禮。前期擇日告太廟。是日。皇太子侍立位於御座之東。餘如冊東宮儀。

但宣制曰封皇子某爲某王禮畢朝謝中宮行八拜禮謝東宮行八拜禮致詞曰小弟某等茲受封冊謹
詣皇太子殿下恭謝親王彼此行賀四拜禮百官賀諸王行八拜禮致詞曰某官某等茲遇親王殿下榮
膺冊寶封建禮成無任忻忭之至次日東宮及百官上表箋賀皇帝中宮東宮賀中宮東宮在上前致詞
云長子某茲遇諸弟某等受封建國謹詣父皇陛下稱賀中宮則曰母后殿下皆八拜禮中宮受內外命
婦賀致詞云妾某氏茲遇親王受封建國恭詣皇后殿下稱賀東宮乃受百官賀與東宮初立儀同

公主冊立儀

凡公主冊立行禮於乾清宮上皮弁服中宮翟衣遣使宣制皆以女官公主服九翫四鳳冠翟衣於殿西
受冊畢四拜收冊訖詣上前八拜中宮前八拜次見皇妃東宮及妃如常儀

皇子誕生儀

凡皇子初生三日上親詣南郊奏告同日告太廟社稷內殿及各壇廟行事俱祭服具告文行三獻禮南
北加太牢餘酒果脯醢文官五品武官四品隨詣南郊文官三品武官公侯駙馬伯皇親仍詣內殿各具
服行禮上御皇極殿百官具吉服稱賀先後行四拜禮自誕生之日爲始吉服十日擇日頒詔天下分遣
翰林六科官齎捧御書往各王府報知及朝鮮

皇子命名儀

凡皇子生三月欽天監擇日時禮部同翰林院備查欽賜過宗室名同字行者進覽以避重複開擬數字

上請簡定前期上擇內夫人之敬慎者以奉皇太子翦髮前一日上詣廟告至日保姆抱遂翦髮爲髻留角如儀上具皮弁服御乾清宮陞御座皇后率妃嬪之生子者各具服朝行四拜禮畢皇后侍立東面妃嬪後保姆抱皇子出寢至授皇后內贊曰皇后率某妃嬪某氏若皇后生則云皇后敢用吉日祇見皇子上升座命以制詞執皇子右手賜之名皇后敬對畢授保姆還寢皇后率妃嬪復四拜次日上御門降手敕以皇子睿名傳諭禮部行宗人府上籍玉牒

皇女誕生命名儀

凡皇女誕生祇告內殿彌月卽命名不用外衙門擇日餘如皇子命名儀是日宮中舉宴禮如儀

○上尊號

皇太后上尊號儀

天子登極奉母后或母妃爲皇太后則上尊號其後或以慶典推崇皇太后則加稱二字或四字爲徽號前期太常官具奏致齋三日遣官祭告天地宗廟社稷上親告几筵是日鳴鐘鼓百官具朝服隨班行禮前一日內使於奉天門設冊寶綵輿冊東寶西設香亭於南教坊設中和韶樂及大樂不作是日陳設如常儀內官設太后寶座於宮中及儀仗女官女樂如常設冊寶案一於皇太后座前設皇帝拜位於丹陛上設親王拜位於丹墀至期皇帝臨奉天門捧冊寶官俟皇帝具冕服出置綵輿舉輿導駕隨冊寶陞輅百官於金水橋南北向序立冊寶過皆跪過乃興隨皇帝至思善門內降輅百官在門外北向序立女官

請皇太后陞座冊寶由中門進置丹陛皇帝拜位左右內引禮官導皇帝由左門入至丹陛右內贊唱執事官各司其事皇帝至拜位親王等各具冕服就拜位奏四拜傳唱百官皆四拜捧冊寶官由中門入至皇太后左立皇帝由殿左門入至拜位傳王及百官皆跪摺圭奉冊寶訖宣冊寶畢出圭俯伏興平身王及百官皆如之奏復位奏四拜王及百官同畢奏禮畢駕輿是日禮成內官先具謁告儀物翰林院具謁謝文皇太后率皇后皇妃各具服祇謁奉先殿及几筵如常儀謁謝禮畢皇太后服燕居服陞宮中寶座儀仗女樂如常內引禮引皇帝皇后皇妃皇太子親王公主及宮官行慶賀禮如常儀次日外命婦四品以上入進表箋行四拜禮○太皇太后尊號同○上徽號則無几筵之謁舉大樂韶樂上致詞曰嗣皇帝臣伏惟皇太后陛下功德兼隆顯崇徽號永膺福壽率士同歡而慶賀日命婦致詞云某夫人妾某氏等恭惟皇太后殿下德同坤厚允協徽稱壽福無疆輿情歡戴若尊號則未立皇太子徽號則皇太子班親王上其宮中慶賀如常儀

○大禮

耕籍儀

凡耕籍每歲仲春上戊日祭社稷及先農前期預告奉先殿先二日順天府官以耒耜及穜稑種進呈少頃內官捧出授順天府官捧由午門左門出置綵輿鼓樂送至籍田所至日祭社稷畢昧爽上具翼善冠黃袍御奉天門太常寺官請詣先農壇上陞輦鹵簿導從詣壇所具服殿更衣致祭畢還具服殿更翼善

冠黃袍少憩百官易便服訖太常卿奏請詣耕籍位導上至耕籍位南向立三公以下從耕者各就耕位戶部尙書北向跪進耒耜順天府官進鞭教坊作樂歌舞呼左右贊相上秉耒三推訖原官跪受耒耜鞭太常奏復位順天府官捧青箱隨種而覆之上御觀耕臺視三公五推尙書九卿九推訖奏耕畢從耕官各就班導上詣齋宮上陞座奏從耕陪祭官叩頭奏順天府縣官老人叩導訖引上中下農夫各十人著本等衣鞋執農器叩頭終畝人賜布一疋贊入班百官序定致詞云親耕既成禮當慶賀五拜三叩頭禮畢賜百官酒飯鴻臚官承旨贊入班又五拜三叩頭尙膳監進膳三品以上官就殿臺四品以下官臺下御路傍東西向皆賜座并宴勞耆老人等於壇傍教坊用大樂隊舞村田樂雜戲跪奏致語進酒進湯進膳及百官行禮俱奏樂如常儀畢入班行一拜三叩頭禮訖駕輿還宮○肅宗行西苑耕穫禮及帝社稷壇春祈秋報禮後革不列

視學儀

凡上擇日視學前期一日太常備太牢牲幣祭儀設大成樂於殿上列樂舞於階下錦衣設御幄於大成門東上南向設御座於彝倫堂設經案於堂內左設講案於堂內西南至日置經於案設鹵簿大駕及大樂於午門外是日百官先詣國子監門外迎駕分奠陪祀官具祭服候行禮陪祀武官自都督以上文官三品以上翰林官七品以上駕從長安門出樂設而不作學官率諸生迎上於大成門外跪叩頭過起上步入御幄具皮弁服盥洗詣大成殿陛下典儀唱執事官各司其事執事官先斟酒於爵候上至拜位百

官亦各就位四配十哲兩廡分奠官各就位迎神樂作樂止上行二拜百官同跪摺圭奠獻出圭樂作樂止興如常儀送神二拜樂作止如之導上出還入御幄易常服訖上陞輿由櫺星門自太學門入諸生先分列堂下學官列諸生前迎駕如常儀上至彝倫陞御座贊學官諸生行五拜三叩頭禮衍聖公三氏子孫武官都督以上文官三品翰林官七品以上陞堂各以次序立贊進講祭酒等以次陞堂由東小門入至堂中舉案授經皆跪叩頭就西南几榻上坐講上賜各官坐諸生圜立聽祭酒講畢叩頭退就本位司業講如儀凡講畢叩頭各官起立宣制學官諸生跪聽行五拜三叩頭禮畢先從東西小門出列於成賢街之右候上進茶命光祿寺賜各官茶畢各官退列於堂門外叩頭序立上起陞輿由太學門出陞輦鹵簿大樂前導出太學門學官諸生跪叩頭送上還宮次日百官常服行慶賀禮致詞云恭惟皇上敬禮先師親臨太學增光前烈丕闡鴻猷臣等欣逢盛事禮當慶賀明日製封衍聖公率三氏子孫祭酒司業率學官諸生上表謝恩上具皮弁服御皇極殿百官朝服侍班行禮上易服御皇極門禮部引奏賜衍聖公等衣服諸生鈔錠是日賜宴於禮部凡陪祀官皆與宴又明日謝恩上賜敕勉勵師生祭酒捧出至太學開讀再明日仍謝恩凡公侯伯聽講班列學官之次諸生之前三氏族人立文官之次各衙門辦事監生回監迎駕聽講觀禮

大射禮儀

凡遇郊廟之祭先期命文武官執事行大射之禮其儀按周禮王大射則合諸侯之耦其屬有射人掌張

三侯司弓矢掌六弓八矢之法服不氏掌贊張侯以旌居乏而待獲古大司馬今兵部職也今以兵部掌之鵠七虎鵠五采熊鵠五采皇太子用之豹鵠五采親王用之一品二品用豹鵠四采三品至五品用鵠三采六品至九品用狐鵠二采文武官子弟及俊秀用布鵠無采乏又曰容爲執旗者蔽身設射中五皮樹中天子大射用之間中天子宴用射用之虎中皇太子親王用之兕中一品至五品鹿中六品以下及俊秀其職事設司正掌驗射品級尊卑人力強弱而定耦其中否則書於算兵部官職之司射掌先以強弓射鼓衆氣武職充之司射器官掌辨弓分三等驗人力授之工部官職之舉爵官掌飲中者光祿爲之請射者掌定耦以次請射執旗者於容後中的舉紅旗采以采旗西以白東以青過以黃不及以黑以軍士爲之引禮則掌文武官進退之法凡射先定耦以次就射位人三矢同耦以齒序勝負以多少計貴不矜凡天子射則行禮而後射射復行禮賞罰出於一時無定例

策士及讀卷傳臚上表謝恩儀

凡會試放榜於三月十五日策士先期鴻臚設題案殿東光祿寺備試桌至日蚤禮部引貢士入丹墀序立百官公服侍立如常鴻臚請陞殿上常服御皇極殿鳴鞭百官行叩頭禮執事官舉題案於殿內侍以題置殿上貢士就拜位行五拜三叩頭禮各分東西立禮部及執事舉題案由左階置丹墀東奏禮畢鳴鞭駕輿百官出軍校列桌禮部散題貢士跪接如遇雨列兩廡○讀卷○殿試後二日駕御文華殿不用侍班儀衛讀卷官執卷隨至門外上陞殿傳進各官至丹陛行叩頭禮入殿內東西立傳讀卷爲首者至

御前朗讀訖。內侍接卷至御案。叩頭興復班。以次如儀。三卷畢。上若命再讀幾卷。或免讀。各官執卷跪接。置如儀。出丹陛。行叩頭禮畢。出門外。候上將試卷裁定。御批一甲三名。餘發內閣。上還宮。是日各官先將二甲一名以拆填黃榜。○傳臚。○至期於中極殿東置黃榜案。百官具朝服候行禮。是蚤鼓未鳴。先開左掖門。放讀卷。提調執事各官入中極殿門外。候上具皮弁服陞座。各官行叩頭禮畢。進殿內供事。讀卷官拆第一卷。奏第一甲第一名某人。二三卷如之。填黃榜訖。用寶完。翰林官捧出皇極殿。候讀卷。提調等官先退出。執事官行五拜三叩頭禮。導駕陞殿作堂下樂。鳴鞭。執事官舉案於簾前。以榜授禮部官。置案各貢士就拜位四拜。奏傳制。舉榜由殿左門置丹墀御道中。贊跪。傳制官稱有制制曰。某年三月十五日策試天下貢士某人等若干名。第一甲賜進士及第。第二甲賜進士出身。第三甲賜同進士出身。第一甲第一名某人。二三名如之。第二甲某人等若干名。第三甲某人等若干名。傳訖。俯伏興平身。又四拜。進士分東西侍立。執事官舉榜案於皇極左門出。進士隨出。百官入班。致詞官於丹陛中致詞曰。天開文運。賢俊登庸。禮當慶賀。五拜三叩頭禮畢。鳴鞭。駕興。○上表謝恩。○設表案如常。至日。設鹵簿。駕鴻臚寺官狀元捧表置於案。退立丹墀御道稍東。諸進士以次立。上具皮弁服御中極殿。執事官行禮。陞殿作樂。鳴鞭如常。百官朝服行禮如常儀。鴻臚引狀元及進士入班。四拜進表。宣表目。俯伏興。撤樂。狀元進士又四拜禮畢。鳴鞭駕興。

巡狩儀

凡遇天子巡狩。以皇太子或皇太孫監國。并擇留守大臣。先期誥告天下諸司及各處鎮守督撫官。預護駕兵馬。及備辦供應。臨時上親奏告郊廟。分遣官告北郊社稷羣廟各神祇。分撥護駕總兵以下官軍。兵分五軍翼衛。設京城守門大臣及官兵。增添京城內外巡捕。及各邊文職重臣。充行邊使。閱視邊備。遴選扈從勳戚。及文武官譯字天文醫士。教坊樂官廚役等項。俱給牙牌牌子。鑄給各官行在衙門印信關防。戶部侍郎一員率屬官六員。帶領太倉銀前行。整理官軍糧料。工部官同內官監官前行。督修橋道及行宮簷殿。凡要緊重事。達行在奏聞。餘從在京通政司封送行在。各衙門事啓。請皇太子或皇太孫事有疑礙。差人赴行在取旨。各進表箋赴在京禮部照常授司禮監。其特賀大禮不係常典。原人詣行在恭進。至日。輒祭於承天門。駕出正陽門。錦衣衛設武陳。駕備輦輿儀仗等物。扈行大約用旗校八千人。百官送駕於郊外。行叩頭禮。凡經過處所。祭祖陵、皇陵、孝陵、獄鎮瀆、名山大川、先師孔子、帝王陵寢、古先聖賢忠臣烈士祠墳。禮部預期奏聞。或親祭。或遣官俱翰林院官撰告文。太常寺備祭品。各處撫按二司有司官俱於管轄境上候駕。先赴行在鴻臚司報名。御駕行殿。各官吉服朝見。所過軍衛官吏。生員耆老人等合迎送駕者。隨地方官後跪迎送。凡朝見行五拜三叩頭禮。過藩封處所。親王具常服出城迎接。其宗室不許擅離本府。先期命文武大臣侍於途。王道傍拱立。文武官下馬侍立左右。禮部尙書跪奏某王某恭迎聖駕。見內侍引王至駕前行叩頭禮。隨傳旨示王隨至行宮。上少憩。具冕服陞行殿。文武侍班如常儀。王由殿左門入。行五拜三叩頭禮。賜宴從官。叩頭如常儀。凡經過地方。分遣廷臣考覈守令諸官賢否。卽加黜

陟分遣官存問高年賜幣帛酒肉至巡狩處朝賀宴饗如京師儀聖駕回京百官郊外迎行叩頭禮入宮遲上親行祭告禮於內殿餘遣官祭如初儀百官上表稱賀如常儀宴勞扈從人等賞賜鈔錠收各行在敕印關防撤回守門巡邊各官內外解嚴

親蠶儀

凡皇后親蠶先期擇日順天府遵蠶母奏送蠶室工部具蠶具什物送給蠶母順天府將蠶種鉤筐一副進呈訖捧出置綵輿送蠶所親蠶壇先在安定門後改建於西苑先一日設皇后採桑位於臺東向以西爲上設公主及內外命婦採位以次訖至日蚤備兵衛儀仗及重翟車蠶公令備鉤筐內執事女樂并司贊六尚女官等皆乘車先至壇所將明內侍奏請皇后詣先蠶壇所皇后服常服女官導引乘肩輿侍衛如常儀公主及內命婦乘車從外命婦先入壇候皇后入壇至具服殿憩易禮服詣先蠶處祭畢禮詳祭祀更常服司賓引外命婦先詣採桑臺位南北向女侍執鉤筐東向公主以下各就位南北向執鉤者跪進鉤執筐者跪以筐受桑皇后採桑三條還至壇南儀門坐觀命婦採桑三公命婦採五條列侯九卿命婦採桑九條各以筐授女侍司賓引內命婦一人詣蠶室觀蠶母飼蠶畢復命尚儀奏採桑畢皇后還具服殿陞座尚儀奏司賓率蠶母等先行叩頭禮訖贊外命婦四拜賜命婦宴於殿內外并賜蠶母酒食於臺傍公主及內命婦坐殿內文武二品坐殿臺上三品以下坐臺下教坊奏女樂進酒進膳進湯如儀畢公主以下行四拜禮奏禮畢皇后輿還宮命婦退